

**BOSNA I HERCEGOVINA
MINISTARSTVO PRAVDE**

PREDNACRT

**ZAKON
O ADVOKATURI BOSNE I
HERCEGOVINE**

mart 2008. godine

Na osnovu člana IV. 4.a) Ustava Bosne i Hercegovine, Parlamentarna skupština Bosne i Hercegovine, na _____ sjednici Predstavničkog doma, održanoj _____ 2008. godine, i na _____ sjednici Doma naroda, održanoj _____ 2008. godine, donijela je

ZAKON O ADVOKATURI BOSNE I HERCEGOVINE

DIO PRVI – OSNOVNE ODREDBE

Član 1. Sadržaj zakona

Ovim zakonom uređuju se organizacija i položaj advokature u Bosni i Hercegovini kao nezavisne i samostalne djelatnosti koja osigurava pružanje stručne pravne pomoći domaćim i stranim fizičkim i pravnim licima u ostvarivanju i zaštiti njihovih prava, obaveza i pravnih interesa u skladu sa Ustavom Bosne i Hercegovine, međunarodnim pravom, ovim zakonom, Statutom i Kodeksom advokatske etike, kao i drugim propisima i ostalim općim aktima.

Član 2. Samostalnost i nezavisnost advokature

(1) Advokatura je samostalna i nezavisna profesionalna djelatnost koja se organizuje i funkcioniše u skladu sa Ustavom Bosne i Hercegovine, međunaordnim pravom i ovim zakonom, kao i općim aktima Advokatske komore Bosne i Hercegovine i Kodeskom advokatske etike.

(2) Samostalnost i nezavisnost advokature ostvaruje se posebno:

- a) nezavisnim i profesionalnim vršenjem usluga pravne pomoći;
- b) pravom stranke na slobodan izbor advokata;
- c) organizovanjem advokata u advokatsku komoru kao nezavisnu i samostalnu organizaciju sa slobodnim učlanjenjem;
- d) donošenjem Statuta kojim se reguliše rad advokatske komore i njenih organa;
- e) donošenjem Kodeksa advokatske etike;
- f) donošenjem ostalih općih akata kojima se regulira rad organa advokatske asocijacije;
- g) odlučivanjem o pravu na obavljanje advokatske djelatnosti, privremenoj zabrani i prestanku obavljanja djelatnosti;
- h) odlučivanjem o oblicima saradnje sa advokatskim komorama stranih država, međudržavnim i međunarodnim udruženjima advokata;
- i) odlučivanjem o saradnji sa drugim međudržavnim i međunarodnim institucijama, organizacijama i udruženjima;

- j) odlučivanjem o izboru svojih predstavnika u Visoko sudsko i tužilačko vijeće Bosne i Hercegovine i izborom svojih predstavnika u međunarodne advokatske asocijacije.

Član 3.

Ovlaštenja advokata

- (1) Advokatska djelatnost obuhvata sve oblike pravne pomoći, a posebno:
- a) zastupanje stranaka (domaćih i stranih fizičkih i pravnih lica);
 - b) davanje pravnih savjeta strankama;
 - c) sastavljanje različitih podnesaka (zahtjevi, tužbe, predstavke, prijedlozi, molbe, žalbe, vanredni pravni lijekovi, apelacije i dr.);
 - d) sastavljanje raznih isprava (ugovori, testamenti i dr.);
 - e) odbrana i zastupanje stranaka pred stalnim i institucionalnim međunarodnim krivičnim sudovima;
 - f) odbrana i zastupanje stranaka pred svim upravnim organima i sudovima u Bosni i Hercegovini: u građanskom, krivičnom, upravnom i prekršajnom postupku, u postupku pred Ustavnim sudom Bosne i Hercegovine i ustavnim sudovima Federacije Bosne i Hercegovine i Republike Srpske;
 - g) zastupanje stranaka i zaštita interesa pred svim pravnim licima, organizacijama i institucijama;
 - h) zastupanje stranaka pred Međunarodnim sudom za ljudska prava u Strasbourgu kao i drugim međunarodnim sudovima u skladu sa ovim zakonom i međunarodnim pravom;
 - i) zastupanje stranaka pred domaćim i međunarodnim institucionaliziranim i/ili *ad hoc* arbitražama u skladu sa međunarodnim pravom;
 - j) zastupanju stranaka pred upravnim organima i/ili sudovima, i/ili arbitražama drugih država u skladu sa međunarodnim pravom i principom reciprociteta, kao i primjenjivim zakonodavstvom druge države u kojoj advokati iz Bosne i Hercegovine zastupaju interese stranaka;
 - k) pregovaranje i sastavljanje domaćih i stranih međunarodnih trgovačkih ugovora;
 - l) zastupanje stranaka pred međunarodnim organizacijama u Bosni i Hercegovini, kao i u mjestima njihovog sjedišta u trećim državama;
 - m) zastupanje advokatskih kancelarija iz trećih država i njihovih stranaka kroz ugovore o zastupanju koji se prijavljuju Ministarstvu pravde Bosne i Hercegovine, u skladu sa principom reciprociteta i međunarodnim pravom;
 - n) pružanje i drugih oblika pravne pomoći domaćim i stranim fizičkim i pravnim licima kako bi se zaštitila njihova prava i interesi.
- (2) Advokatsku djelatnost advokati mogu obavljati u advokatskoj kancelariji, zajedničkoj advokatskoj kancelariji ili advokatskom društvu.

Član 4.

Nespojivost djelatnosti

Advokat ne smije obavljati djelatnosti koje su nespojive s ugledom i nezavisnošću advokature.

Član 5.

Obaveza poštivanja Kodeksa advokatske etike

Prilikom obavljanja advokatske djelatnosti advokat je obavezan poštovati i pridržavati se Kodeksa advokatske etike.

Član 6.

Advokatska tajna

(1) Advokat je dužan čuvati kao advokatsku tajnu sve što mu je stranka povjerila ili što je u zastupanju stranke na drugi način saznao.

(2) Advokatsku tajnu iz stava 1. ovog člana, dužne su čuvati i druge osobe koje rade ili su radile u advokatskoj kancelariji, zajedničkoj advokatskoj kancelariji ili advokatskom društvu.

Član 7.

Savjesno i stručno pružanja pravne pomoći

(1) Advokat je nezavisan u svom radu.

(2) Advokat je dužan da stranci pruža pravnu pomoć savjesno i stručno, u skladu sa Ustavom Bosne i Hercegovine, međunarodnim pravom, zakonom i drugim propisima, kao i Statutom i drugim općim aktima Advokatske komore Bosne i Hercegovine, te Kodeksom advokatske etike.

(3) Advokat ima pravo i dužnost da u okviru zakona i ovlaštenja/punomoćja dobijenih od stranke, preduzima sve što je po njegovoj ocjeni u interesu stranke kojoj pruža pravnu pomoć i u skladu sa profesionalnim standardima advokatske profesije.

Član 8.

Pravo izbora advokata

Svaka stranka ima pravo slobodnog izbora advokata koji je ovlašten da obavlja advokatsku djelatnost u Bosni i Hercegovini, u skladu sa ovim zakonom.

Član 9.

Pružanje pravne pomoći

(1) Pružanje pravne pomoći mogu, pod uslovima utvrđenim ovim zakonom, vršiti jedino advokati i advokatski pripravnici iz Bosne i Hercegovine, osim ako drugim zakonima ili međunarodnim ugovorima nije drugačije određeno.

DIO DRUGI – ADVOKATSKA KOMORA BOSNE I HERCEGOVINE

Član 10.

Osnivanje Advokatske komore Bosne i Hercegovine

(1) Ovim zakonom se osniva Advokatska komora Bosne i Hercegovine i uspostavljaju njeni organi.

(2) Advokati čije se kancelarije, odnosno advokatska društva nalaze na teritoriji Bosne i Hercegovine slobodno se udružuju u Advokatsku komoru Bosne i Hercegovine, kao samostalnu i nezavisnu organizaciju svih advokata u Bosni i Hercegovini, osnovanu ovim zakonom.

Član 11.

Organizacija Advokatske komore Bosne i Hercegovine

(1) Advokatsku komoru Bosne i Hercegovine čine:

- a) Advokati učlanjeni u Advokatsku komoru Federacije Bosne i Hercegovine,
- b) Advokati učlanjeni u Advokatsku komoru Republike Srpske.

(2) Advokatska komora Bosne i Hercegovine ima svojstvo pravne osobe.

(3) Advokati se obavezno udružuju u jednu od advokatskih komora iz stava (1) ovog člana, prema sjedištu njihove advokatske kancelarije, čime ujedno stiču mogućnost prijave za članstvo u Advokatskoj komori Bosne i Hercegovine.

(4) Advokatski pripravnici se obavezno udružuju u advokatske komore iz stava (1) ovog člana, a time stiču uslov za učlanjivanje u Organizaciju advokatskih pripravnika u okviru Advokatske komore Bosne i Hercegovine.

Član 12.

Nadležnosti Advokatske komore Bosne i Hercegovine

(1) Advokatska komora Bosne i Hercegovine predstavlja i zastupa advokate i advokatske pripravnike upisane u Imenik Advokatske komore Bosne i Hercegovine, i obavlja slijedeće zadatke:

- a) razvija i unapređuje advokatsku djelatnost,
- b) obezbjeđuje profesionalnu nezavisnost i samostalnost advokata,
- c) aktivno radi na zaštiti advokature kao samostalne i nezavisne profesije, kao i na javnoj zaštiti od napada usmjerenih na advokate i advokatsku profesiju, te podiže nivo solidarnosti advokata,
- d) promoviše i zagovara u advokatskoj profesiji primjenu međunarodnih pravnih standarda i poštivanje kodeksa advokatske etike,
- e) donosi odluke u vezi sa sticanjem prava na bavljenje advokatskom djelatnošću i djelatnošću advokatskog pripravnika,

- f) pokreće disciplinski postupak i utvrđuje disciplinsku odgovornost za povrede pravila profesionalnog ponašanja,
- g) štiti prava i interese advokata, zajedničkih advokatskih kancelarija, advokatskih društava i advokatskih pripravnika,
- h) organizuje i obezbjeđuje stručno usavršavanje advokata i nadgleda obuku advokatskih pripravnika,
- i) usvaja Pravilnik o polaganju advokatskog ispita kojim definira uslove za polaganje advokatskog ispita
- j) saraduje sa državnim tijelima u rješavanju pitanja značajnih za rad advokature, odnosno za ostvarivanje funkcije i zadataka advokature u društvu.
- h) posreduje između advokata i njihovih stranaka (medijacija),
- i) saraduje sa državnim i međunarodnim organizacijama, institucijama i udruženjima,
- j) koordinira saradnju između advokatskih komora Republike Srpske, Federacije Bosne i Hercegovine, Brčko Distrikta,
- k) ostvaruje punu saradnju sa međunarodnim sudovima i međunarodnim arbitražama,
- l) ostvaruje punu saradnju sa regionalnim i univerzalnim međunarodnim advokatskim asocijacijama i udruženjima advokata,
- m) ostvaruje punu saradnju sa nevladinim i vladinim organizacijama kao i međunarodnim organizacijama,

(2) Advokatska komora Bosne i Hercegovine predstavlja i zastupa sve advokate i advokatske komore u Bosni i Hercegovini pred državnim i drugim tijelima i institucijama, pred međunarodnim advokatskim asocijacijama, kao i međunarodnim organima, organizacijama ili institucijama.

(3) Svakom svom učlanjenom advokatu i advokatskom pripravniku Advokatska komora Bosne i Hercegovine izdaje posebnu akreditaciju. O izdatim akreditacijama Advokatska komora Bosne i Hercegovine zvanično obavještava Ministarstvo pravde Bosne i Hercegovine.

Član 13

Sjedište Advokatske komore

Sjedište Advokatske komore Bosne i Hercegovine je u Sarajevu.

Član 14

Članstvo u Advokatskoj komori Bosne i Hercegovine

(1) Nezavisno od prava koja ostvaruju na osnovu članstva u advokatskim komorama iz člana 11. stava (1) ovog zakona, samo članovi Advokatske komore Bosne i Hercegovine imaju pravo da:

- a) zastupaju stranke pred Ustavnim sudom Bosne i Hercegovine i Sudom Bosne i Hercegovine, kao i pred svim ostalim upravnim organima i njihovim agencijama, kao i svim ostalim sudskim institucijama na razini države Bosne i Hercegovine,
- b) zastupaju stranke pred svim međunarodnim sudovima, međunarodnim arbitražama, međunarodnim organizacijama i njihovim organima i

- agencijama, vladinim i nevladinim organizacijama,
- c) zastupaju inostrane stranke (fizička i pravna lica) pred svim sudovima i upravnim organima u Bosni i Hercegovini, pred međunarodnim organizacijama u Bosni i Hercegovini, kao i pred ostalim organizacijama i institucijama,
- d) obavljaju advokatske poslove u trećim zemljama u skladu sa principima reciprociteta i međunarodnim pravom,
- e) sačinjavaju obligacione ugovore koje priznaje pravni poredak u Bosni i Hercegovini.

Član 15.

Organi Advokatske komore Bosne i Hercegovine

- (1) Organi Advokatske komore Bosne i Hercegovine su:
- a) skupština,
 - b) upravni odbor,
 - c) predsjednik i dva potpredsjednika,
 - d) nadzorni odbor,
 - e) disciplinski sud i disciplinski tužilac,
 - f) odbor za reviziju finansijskog i materijalnog poslovanja Advokatske komore Bosne i Hercegovine,
 - g) komisija za polaganje advokatskog ispita,
 - h) drugi organi utvrđeni Statutom Advokatske komore Bosne i Hercegovine.

(2) Mandat predsjednika i dva potpredsjednika Advokatske komore Bosne i Hercegovine se ne može povjeriti istoj osobi drugi put u kontinuitetu, ali potpredsjednik nakon isteka njegovog mandata može biti biran na mjesto predsjednika Advokatske komore Bosne i Hercegovine.

(3) Mandat predsjednika i potpredsjednika i svih drugih organa Advokatske komore Bosne i Hercegovine, traje 4 godine.

(4) Izborna skupština Advokatske komore Bosne i Hercegovine donosi Statut, Kodeks advokatske etike i Pravilnik o disciplinskoj odgovornosti.

Član 16.

Konstituirajuća, Izborna i Redovne skupštine

(1) Konstituirajuću i Izbornu skupštinu Advokatske komore Bosne i Hercegovine sačinjavaju već izabrani delegati u skupštinama Advokatske komore Federacije Bosne i Hercegovine i Advokatske komore Republike Srpske, kao i delegati Organizacije advokatskih pripravnika izabrani u skupštine ovih advokatskih asocijacija.

(2) Skupštine komora iz stava 1. ovog člana, čine već izabrani advokati koji su članovi Konstituirajuće i Izborne Skupštine Advokatske komore Bosne i Hercegovine.

(3) Nakon održavanja Konstituirajuće i Izborne skupštine bit će sazvana i održana prva Redovna skupština. Delegati na drugoj Redovnoj skupštini Advokatske komore Bosne i Hercegovine mogu biti samo njeni članovi, te mogu birati i biti birani u njene organe. Na svim redovnim skupštinama sve odluke punopravno donose prisutni delegati. Prije održavanja svake redovne skupštine utvrđuje se lista prisutnih delegata Advokatske komore Bosne i Hercegovine koji punopravno donose odluke.

(4) Izabrani delegati u skupštinama Advokatske komore Federacije Bosne i Hercegovine i Advokatske komore Republike Srpske, delegati su na Konstituirajućoj, Izornoj i svim redovnim skupštinama Advokatske komore Bosne i Hercegovine, pri čemu svi delegati entitetskih advokatskih skupština treba da biraju jednog delegata na svakih deset (10) članova entitetskih advokatskih komora u skladu sa zakonima i opštim aktima. Entitetske advokatske komore svakih šest mjeseci dostavljaju Advokatskoj komori Bosne i Hercegovine i Ministarstvu pravde Bosne i Hercegovine spisak svojih članova/advokata, kao i spiskove delegata u njihovim skupštinama.

(5) Sva pitanja u pogledu funkcionisanja i izbora članova u Skupštini Advokatske komore Bosne i Hercegovine propisuju se Statutom.

Član 17. Nadležnosti Skupštine

Skupština Advokatske komore Bosne i Hercegovine:

- a) usvaja opće akte Advokatske komore Bosne i Hercegovine i Poslovnik o radu skupštine Advokatske komore Bosne i Hercegovine,
- b) bira i razrješava druge organe Advokatske komore Bosne i Hercegovine, ako ovim zakonom nije drugačije određeno,
- c) usvaja finansijski plan i izvještaj o realizaciji finansijskog plana Advokatske komore Bosne i Hercegovine,
- d) usvaja izvještaj Predsjednika i Upravnog odbora Advokatske komore Bosne i Hercegovine,
- e) predlaže advokatsku tarifu,
- f) odlučuje o svim pitanjima koja se odnose na primjenu ovog zakona u skladu sa Statutom,
- g) odlučuje o oblicima saradnje Advokatske komore Bosne i Hercegovine sa drugim advokatskim komorama i sličnim asocijacijama,
- h) odlučuje o svim drugim pitanjima koja su u njenoj nadležnosti po zakonu i općim aktima Advokatske komore Bosne i Hercegovine.

Član 18. Oblici skupštinskog rada

(1) Skupština Advokatske komore Bosne i Hercegovine može biti konstituirajuća, izborna, redovna i vanredna.

(2) Nakon sazivanja i održavanja Konstituirajuće i Izborne skupštine, redovne skupštine održavat će se obavezno jedanput godišnje. Izborna skupština održava se svake četiri godine i na njoj se biraju predsjednik i dva potpredsjednika Advokatske komore Bosne i Hercegovine, dio članova Upravnog odbora, Nadzornog odbora,

članovi Disciplinskog suda i Disciplinski tužilac. Vanredna skupština se održava po potrebi i saziva je Upravni odbor ili jedna trećina delegata Skupštine pismenim zahtjevom upućenim Predsjedniku i dvojici potpredsjednika Advokatske komore Bosne i Hercegovine kao i Upravnom odboru koji su obavezni u roku od 60 dana pripremiti, sazvati i održati Vanrednu skupštinu koja će sadržajem svoga rada biti fokusirana na razlog njenog sazivanja.

(3) Za rad i odlučivanje Skupštine u prvom sazivu potrebno je da bude prisutna natpolovična većina delegata. Odluke Skupštine se smatraju usvojenim, ukoliko je za njih glasalo više od polovine prisutnih delegata.

(4) Za svaku narednu skupštinu i punovažno donošenje odluka potreban je kvorum koji sačinjava prisustvo više od jedne polovine od ukupnog broja delegata iz prethodnog stava.

Član 19. Posebna većina

Kada Skupština odlučuje i usvaja Statut, Kodeks advokatske etike i Pravilnik o disciplinskoj odgovornosti advokata i advokatskih pripravnika, odluka se smatra usvojenom ukoliko za nju glasa više od polovine prisutnih delegata na Konstituirajućoj i Izornoj skupštini.

Član 20. Predsjednik Advokatske komore Bosne i Hercegovine

(1) Predsjednik Advokatske komore Bosne i Hercegovine:

- a) predstavlja i zastupa Advokatsku komoru Bosne i Hercegovine;
- b) preduzima radnje da osigura zaštitu ustavnosti i zakonitosti u radu advokatske komore;
- c) uspostavlja i koordinira saradnju advokatske komore sa zakonodavnom, sudskom i izvršnom vlašću u Bosni i Hercegovini
- d) uspostavlja i koordinira saradnju Advokatske komore Bosne i Hercegovine sa advokatskim komorama Federacije BiH, Republike Srpske, asocijacijama advokata stranih država, regionalnim i međunarodnim advokatskim udruženjima
- e) uspostavlja i koordinira saradnju advokatske komore sa državnim ili međunarodnim organizacijama, institucijama ili asocijacijama
- f) izvršava i druge poslove u skladu sa ovim zakonom i općim aktima advokatske komore.

(2) Predsjednik i potpredsjednici Advokatske komore Bosne i Hercegovine podnose izvještaj o radu Skupštini Advokatske komore Bosne i Hercegovine, kojoj su odgovorni za svoj rad.

Član 21. Upravni odbor

Upravni odbor Advokatske komore Bosne i Hercegovine sastoji se od 12 članova koje bira Skupština kao i Predsjednika i potpredsjednika Advokatske komore Bosne i Hercegovine koji su na osnovu svoje funkcije i članovi Upravnog odbora. Članovi Upravnog odbora biraju se na Izornoj skupštini. Koordinaciono tijelo ima pravo predlaganja za izbor članova Upravnog odbora a izbor se vrši između najmanje dvostrukog većeg broja kandidata od onog koji se bira .

Član 22.

Nadležnosti Upravnog odbora

(1) Upravni odbor Advokatske komore Bosne i Hercegovine:

- a) odlučuje o uređenju i vođenju Imenika advokata, Imenika advokatskih pripravnika, Imenika zajedničkih advokatskih kancelarija i Imenika advokatskih društava Advokatske komore Bosne i Hercegovine;
- b) odlučuje o upisu u Imenike i brisanju iz Imenika advokata, advokatskih pripravnika, zajedničkih advokatski kancelarija i advokatskih društava Advokatske komore Bosne i Hercegovine, uključujući po potrebi i imenovanje odgovarajućih tijela ili komisija radi pružanja pomoći u izvršavanju tih funkcija;
- c) odlučuje o pravima, obavezama i profesionalnim odgovornostima advokata i advokatskih pripravnika, uključujući po potrebi imenovanje odgovarajućih tijela ili komisija radi pružanja pomoći u izvršavanju tih funkcija;
- d) izvršava finansijski plan Advokatske komore Bosne i Hercegovine uključujući preuzimanje i izvršenje finansijskih obaveza Advokatske komore Bosne i Hercegovine saglasno finansijskom planu;
- e) odlučuje o iznosima upisnine u imenike, koji ne može biti veći od četiri prosječne neto plate na nivou Bosne i Hercegovine iz prethodne godine, a koji podatak je objavljen u Službenom glasniku BiH, kao i advokatske članarine i pretplate za publikacije;
- f) organizuje rad sekretarijata Advokatske komore Bosne i Hercegovine;
- g) odlučuje o zapošljavanju administrativnog i tehničkog osoblja u Sekretarijatu Advokatske komore Bosne i Hercegovine;
- h) bira i imenuje glavnog urednika i uređivački odbor u časopisu Advokatske komore Bosne i Hercegovine;
- i) izvršava i druge poslove na osnovu zakona i opštih akata Advokatske komore Bosne i Hercegovine.

(2) Upravni odbor je izvršni organ Skupštine Advokatske komore Bosne i Hercegovine.

(3) Odluka Upravnog odbora iz tačke b) i c) stava (1) ovog člana, jeste upravni akt protiv kojeg žalba nije dozvoljena ali se može pokrenuti upravni spor pred Sudom Bosne i Hercegovine.

(4) Protiv odluke Upravnog odbora iz tačke g) stav (1) ovog člana, žalba nije dozvoljena ali se može pokrenuti parnični postupak iz oblasti radnih odnosa pred sudom opće nadležnosti prema sjedištu Advokatske komore Bosne i Hercegovine.

Član 23.

Opće odredbe o organima Advokatske komore Bosne i Hercegovine

(1) Opće odredbe o nadležnostima, sazivanju, organizaciji i radu Skupštine, predsjednika i potpredsjednika, Upravnog odbora, Nadzornog odbora, Odbor za reviziju finansijskog i materijalnog poslovanja Advokatske komore Bosne i Hercegovine, kao i drugih organa, utvrđuju se Statutom Advokatske komore Bosne i Hercegovine.

(2) Za vršenje zajedničkih pravnih, stručnih, tehničkih i drugih poslova, Advokatske komore Bosne i Hercegovine i njenih organa iz člana 15. ovog zakona, osniva se Sekretarijat Advokatske komore Bosne i Hercegovine.

Član 24.

Disciplinski organi

Disciplinski organi advokatske komore Bosne i Hercegovine su nezavisni organi advokatske komore koji odlučuju o pokretanju disciplinskog postupka protiv advokata i advokatskih pripravnika, vode disciplinski postupak, utvrđuju disciplinsku odgovornosti i izvršavaju izrečene disciplinske mjere.

Član 25.

Revizija poslovanja

Poslove revizije finansijskog i materijalnog poslovanja Advokatske komore Bosne i Hercegovine vrši Odbor za reviziju finansijskog i materijalnog poslovanja Bosne i Hercegovine.

Član 26.

Odbor za reviziju

(1) Odbor za reviziju finansijskog i materijalnog poslovanja Advokatske komore Bosne i Hercegovine vrši poslove kontrole i podnosi izvještaje o finansijskom i materijalnom poslovanju, o periodičnom poslovanju i završnom računu i godišnjem bilansu, nadležnim organima Advokatske komore Bosne i Hercegovine.

(2) Odbor za reviziju finansijskog i materijalnog poslovanja Advokatske komore Bosne i Hercegovine ima pet (5) članova, koji iz svojih redova biraju predsjednika.

(4) Sastav odbora za reviziju čine četiri (4) člana advokata iz reda advokata upisanih u imenik advokata Advokatske komore Bosne i Hercegovine, a peti član je finansijski stručnjak čiji rad ugovara nadležni organ Advokatske komore Bosne i Hercegovine.

(5) Predsjednik i potpredsjednici Advokatske komore Bosne i Hercegovine i članovi Upravnog odbora ne mogu biti članovi Odbora za reviziju finansijskog i materijalnog poslovanja Advokatske komore Bosne i Hercegovine.

Član 27.

Opći akti Advokatske komore Bosne i Hercegovine

Opći akti Advokatske komore Bosne i Hercegovine su:

- a) Statut,
- b) Kodeks advokatske etike,
- c) Pravilnik o disciplinskoj odgovornosti advokata i advokatskih pripravnika,
- d) Pravilnik o polaganju advokatskog ispita

Član 28.

Obaveza objavljivanja općih akata

Opći akti Advokatske komore Bosne i Hercegovine objavljuju se u „Službenom glasniku Bosne i Hercegovine“.

Član 29.

Statut

Statutom se uređuje:

- a) rad skupštine i drugih organa Advokatske komore Bosne i Hercegovine iz člana 15. ovog zakona,
- b) finansijsko i materijalno poslovanje Advokatske komore Bosne i Hercegovine,
- c) procedura za sticanje prava na obavljanje advokatske djelatnosti i djelatnosti advokatskog pripravnikom te procedure za utvrđivanje disciplinske odgovornosti i izricanje sankcija,
- d) prava, obaveze i odgovornosti advokata i advokatskih pripravnika,
- e) udruživanje i rad advokata u zajedničkoj advokatskoj kancelariji
- f) osnivanje i djelatnost advokatskih društava,
- g) organizacija, finansiranje i rad organizacije advokatskih pripravnika,
- h) donošenje i stupanje na snagu općih akata.

Član 30.

Kodeks advokatske etike

(1) Kodeksom advokatske etike Advokatske komore Bosne i Hercegovine uređuju se ukupna načelna pravila koja su za advokate i advokatske pripravnike opće obavezna pri obavljanju advokatske djelatnosti, a naročito:

- a) Opće, profesionalne i osnovne dužnosti i to:
 - 1) savjesnost,

- 2) čuvanje nezavisnosti,
- 3) diskrecija i advokatska tajna,
- 4) zabrana zastupanja gdje postoji sukob interesa,
- 5) rukovanje sa tuđim imovinskim vrijednostima;
- b) Posebne dužnosti profesije u vezi sa javnim informisanjem;
- c) Posebne dužnosti profesije:
 - 1) u vezi sa primanjem i završavanjem naloga stranke,
 - 2) kod savjetovanja stranaka sa malim prihodima;
- d) Posebne dužnosti profesije prema sudovima i drugim organima i tijelima kao što su:
 1. profesionalno ponašanje pred sudovima i drugim organima,
 2. dužnosti kod upotrebe na uvid prepuštenih spisa, kao i iz toga stečenog znanja,
 3. dužnosti kod dostave spisa;
- e) Posebne dužnosti profesije u odnosu na držanje novčanih sredstava klijenta i računovodstvo u vezi s tim, ugovaranje i obračun advokatskih usluga i njihovoj naplati;
- f) Posebne dužnosti profesije prema advokatskim komorama, profesionalnom ponašanju prema drugim članovima advokatske komore, dužnosti kod profesionalne saradnje, dužnosti u vezi upisa advokata, kod obrazovanja i zapošljavanja drugih saradnika;
- g) Posebne dužnosti profesije u međunarodnom pravnom prometu.

(2) Kodeks advokatske etike Advokatske komore Bosne i Hercegovine treba da bude usaglašen sa međunarodno pravnim standardima advokatske etike i advokatske profesije.

Član 31.

Pravilnik o disciplinskoj odgovornosti

Pravilnik o disciplinskoj odgovornosti detaljnije definiše rad i nadležnosti disciplinskog suda i disciplinskog tužioca uključujući propise koji regulišu pokretanje disciplinskog postupka protiv advokata i advokatskih pripravnika, vođenje ovih postupaka, utvrđivanje njihove disciplinske odgovornosti i izvršavanje izrečenih disciplinskih mjera.

Član 32.

Advokatski ispit

(1) Skupština Advokatske komore Bosne i Hercegovine usvaja Pravilnik o polaganju advokatskog ispita (Pravilnik) kojim reguliše uvjete za polaganje ispita, način polaganja ispita, način formiranja i funkcionisanja komisije pred kojom se polaže advokatski ispit, rokovi mogućeg pristupanja polaganju advokatskog ispita, izdavanje uvjerenja o ishodu advokatskog ispita, kao i ustanovljavanje evidencije trajnog karaktera o advokatskim ispitima.

(2) Komisiju za polaganje advokatskog ispita (Komisija) imenuje Upravni odbor u skladu sa Statutom. Na Izornoj skupštini usvaja se Pravilnik o radu komisije.

(3) Polaganje advokatskog ispita je uslov za podnošenja zahtjeva za upis u Imenik advokata Advokatske komore Bosne i Hercegovine i polaže se pred Komisijom.

(4) Advokatski ispit prijavljeni kandidat polaže pred Komisijom provjerom znanja iz slijedećih oblasti:

- a) Zakona o advokaturi Bosne i Hercegovine
- b) Kodeksa advokatske etike Advokatske komore Bosne i Hercegovine
- c) Statuta Advokatske komore Bosne i Hercegovine
- d) Disciplinskog pravilnika Advokatske komore Bosne i Hercegovine
- e) Tarife o nagradama i naknadama za rad Advokatske komore Bosne i Hercegovine

Član 33.

Praćenje provedbe zakona

(1) Ministarstvo pravde Bosne i Hercegovine prati rad advokature sa stanovišta provođenja ovog zakona.

(2) U ostvarivanju funkcije iz stava 1. ovog člana Ministarstvo pravde Bosne i Hercegovine može da zahtijeva odgovarajuće izvještaje i podatke od Advokatske komore Bosne i Hercegovine, vodeći računa o nezavisnosti i samostalnosti advokature.

(3) Izvještaje i podatke iz stava (2) ovog člana, Komora je dužna dostaviti Ministarstvu pravde u roku od 30 dana ili u istom roku izvijestiti o razlozima zbog kojih nije u mogućnosti dostaviti zatražene izvještaje ili podatke.

DIO TREĆI – USLOVI ZA OBAVLJANJE ADVOKATSKE DJELATNOSTI

Član 34.

Ovlaštenje za obavljanje advokatske djelatnosti

(1) Advokatske djelatnosti iz člana 3. ovog zakona, mogu obavljati advokati upisani u Imenik advokata u Bosni i Hercegovini ili odgovarajući Imenik u Federaciji BiH i Republici Srpskoj ili regionalnim komorama entiteta, na cijelom području Bosne i Hercegovine.

(2) Pravo obavljanja advokatskih djelatnosti iz člana 3. ovog zakona, pred međunarodnim sudskim, upravnim ili drugim organima ili organizacijama ili međunarodnim arbitražama, imaju advokati upisani u Advokatsku komoru Bosne i Hercegovine.

(3) Ovlaštenje iz stava (2). ovog člana, posebno se navodi u službenoj legitimaciji advokata upisanog u Imenik advokata Advokatske komore Bosne i Hercegovine.

(4) Državljanin druge države koji po zakonu te države ispunjava uslove za obavljanje djelatnosti advokata ima pravo na upis u Imenik advokata pod uslovom postojanja međudržavnog ugovora ili sporazuma sa državom čiji je državljanin.

(5) U slučaju tumačenja prava i dužnosti koja proizilaze iz potpisanog međudržavnog ugovora ili sporazuma a koja se odnose na obavljanje advokatske djelatnosti, tumačenje daje Ministarstvo pravde Bosne i Hercegovine.

(6) Odredbe ovog zakona ne utiču na pravo stranog državljanina koji prema zakonima svoje države ispunjava uslove za obavljanje advokatske djelatnosti, da u Bosni i Hercegovini pruža po principu reciprociteta samo savjetodavnu pravnu pomoć u vezi sa pravom njegove države.

Član 35.

Pravo na upis u Imenik advokata

Pravo na upis u Imenik advokata Advokatske komore Bosne i Hercegovine ima osoba koja, ukoliko nije drugačije određeno zakonom, ispunjava slijedeće uslove:

- a) da je državljanin Bosne i Hercegovine,
- b) da je diplomirala na jednom od pravnih fakulteta u Bosni i Hercegovini ili da je diplomirao na bilo kojem pravnom fakultetu u bivšoj Socijalističkoj Federativnoj Republici Jugoslaviji do 22. maja 1992. godine, a ako je diplomirala na pravnom fakultetu druge države, ovaj uslov stiče nakon nostrifikacije diplome u skladu sa reciprocitetom kojeg utvrđuje Ministarstvo pravde Bosne i Hercegovine,
- c) da ima položen pravosudni ispit u Bosni i Hercegovini ili bivšoj Socijalističkoj Federativnoj Republici Jugoslaviji do 22. maja 1992. godine, a ako je pravosudni ispit položila u drugoj državi, ovaj uslov stiče nakon priznanja tog ispita od strane Ministarstva pravde Bosne i Hercegovine u skladu sa reciprocitetom kojeg utvrđuje Ministarstvo pravde Bosne i Hercegovine,
- d) da je, nakon položenog pravosudnog ispita, stekla najmanje jednu godinu radnog iskustva na pravnim poslovima u advokaturi, sudu, tužilaštvu ili na pravnim poslovima u upravnim ili drugim državnim organima ili organima nekog drugog nivoa vlasti ili u pravnim osobama ili međunarodnim organizacijama, s tim da pravo upisa u Imenik advokata ima i osoba koja nije radila na predhodno nabrojanim poslovima, ako ima položen pravosudni ispit i najmanje šest godina radnog staža na pravnim poslovima,
- e) da nije pravosnažno osuđivana na kaznu zatvora za krivična djela protiv uređenja i bezbjednosti, za krivična djela protiv čovječnosti i međunarodnog prava, protiv službene ili druge odgovorne dužnosti ili za drugo krivično djelo izvršeno iz koristoljublja ili drugih niskih pobuda, osim ako je proteklo deset godina od izdržane, oprostene ili zastarjele kazne,
- f) da nije u radnom odnosu, a osobi koja se nalazi u radnom odnosu danom upisa u Imenik advokata prestaje radni odnos, osim u slučaju zaposlenja u advokatskom društvu,
- g) da je priložila uvjerenje o polaganju Advokatskog ispita,

- h) da je dostojna obavljanja advokatske djelatnosti. Ranije ponašanje i postupci moraju ukazivati da će ta osoba savjesno obavljati advokatsku djelatnost.

Član 36.

Pravo na obavljanje advokatske djelatnosti

(1) Pravo na obavljanje advokatske djelatnosti u skladu sa ovim zakonom stiče se momentom upisa u Imenik advokata koji se vodi kod Advokatske komore Bosne i Hercegovine i nakon davanja svečane izjave.

(2) Imenik advokata je javna knjiga, a nijedan državni ili drugi organ ne može dati odobrenje za obavljanje poslova iz člana 3. ovog zakona, bilo kao osnovno ili kao dopunsko zanimanje, osim ako drugačije nije određeno zakonom.

(3) Nikome, ko ispunjava zakonske uslove za obavljanje advokatske djelatnosti se ne može uskratiti pravo upisa u Imenik advokata zbog njegove etničke, vjerske, političke ili polne pripadnosti.

Član 37.

Postupak upisa

(1) Zahtjev za upis u Imenik advokata Advokatske komore Bosne i Hercegovine, podnosi se organu određenom Statutom.

(2) Uz zahtjev za upis podnosilac zahtjeva, podnosi dokaz o ispunjavanju uslova iz člana 35. ovog zakona, kojom prilikom je dužan naznačiti i mjesto u kome namjerava da otvori advokatsku kancelariju.

(3) U roku od 30 dana od podnesenog zahtjeva, organ iz stava 1. ovog člana, utvrđuje da li postoji zakonom propisani uslovi za upis i donosi rješenje o upisu u Imenik advokata, kojeg vodi organ Advokatske komore Bosne i Hercegovine.

(4) Protiv rješenja kojim je odbijen zahtjev za upis u Imenik advokata, dopuštena je žalba u roku od 15 dana od dana dostave rješenja.

(5) O žalbi odlučuje organ određen Statutom, a protiv konačnog rješenja tog organa, može se pokrenuti upravni spor, podnošenjem tužbe Sudu Bosne i Hercegovine.

(6) Zahtjev za upis u Imenik advokata Advokatske komore Bosne i Hercegovine, može se podnijeti i organima advokatskih komora iz člana 11. stav 1. tačke a) i b) ovog zakona, koje su dužne u roku od 15 dana, od dana podnošenja zahtjeva, isti sa dokumentacijom dostaviti nadležnom organu Advokatske komore Bosne i Hercegovine u cilju donošenja odgovarajuće odluke.

Član 38.
Svečana izjava

(1) Upis advokata u Imenik advokata će se izvršiti na dan kada je utvrđena pravosnažnost rješenja o upisu u Imenik advokata i nakon davanja svečane izjave.

(2) Tekst svečane izjave utvrđuje se Statutom.

(3) Svečana izjava se daje i potpisuje pred predsjednikom ili potpredsjednicima Advokatske komore Bosne i Hercegovine.

DIO ČETVRTI – PRAVA I DUŽNOSTI ADVOKATA

POGLAVLJE I. PRAVA I DUŽNOSTI ADVOKATA U ZASTUPANJU STRANKE

Član 39.
Pružanje pravne pomoći od strane advokata

(1) Sve oblike pravne pomoći određene članom 3. ovog zakona, mogu pružati samo advokati, ako zakonom nije drugačije određeno.

(2) Advokat koji ima dozvolu udruženja advokata druge države za obavljanje advokatske djelatnosti, može vršiti neposredno zastupanje samo putem domicilnih advokata ili ovlaštenih zastupnika, na osnovu prava i ovlašćenja pravnog sistema Bosne i Hercegovine i ovog zakona.

(3) Izuzetno, advokat druge države, može po principu reciprociteta ili bilateralnog sporazuma pružati samo savjetodavnu pomoć a određene pravne radnje samo u skladu sa međudržavnim ugovorom ili sporazumom i u skladu sa preuzetim obavezama Bosne i Hercegovine po osnovu ratificiranja međunarodne konvencije ili ugovora.

Član 40.
Zamjena advokata

(1) U zastupanju stranke advokata može zamijeniti drugi advokat, a uz uslove predviđene zakonom i advokatski pripravnik koji radi u njegovoj kancelariji, osim ako se stranka izričito tome protivi.

(2) Advokat sam određuje zamjenu u vrijeme svoje odsutnosti.

Član 41.
Odbijanje ponude za pružanje pravne pomoći

(1) Advokat samostalno odlučuje da li će prihvatiti ponudu stranke za pružanje savjeta, zastupanje ili odbranu.

(2) Advokat će odbiti zastupanje:

- a) ako je pružao pravnu pomoć suprotnoj stranci u istom predmetu ili po bilo kom drugom pitanju vezanom za taj predmet,
- b) ako je suprotnoj stranci u istom predmetu pravnu pomoć pružao advokat koji radi u istoj advokatskoj kancelariji ili advokatskom društvu,
- c) ako je on ili član ili zaposlenik advokatske kancelarije ili društva radio kao advokatski pripravnik sa advokatom koji pruža pravnu pomoć suprotnoj stranci,
- d) ako je u istom predmetu on ili član ili zaposlenik advokatske kancelarije ili društva postupao kao sudija, tužilac ili ovlaštena službena osoba,
- e) ako se on ili član ili zaposlenik advokatske kancelarije ili društva bavio na drugi profesionalni način predmetnim slučajem,
- f) ako on ili član ili zaposlenik advokatske kancelarije ili društva ima osobni interes koji je, ili može biti, u sukobu sa interesima zastupane stranke, i
- g) u drugim slučajevima predviđenim zakonom ili općim aktima Advokatske komore Bosne i Hercegovine.

(3) U slučajevima predviđenim tačkom b), c), e) i g) stava (2) ovog člana, advokat može prihvatiti ponudu za pružanje pravne pomoći po pristanku zastupane stranke koja je prethodno u potpunosti informisana o svim bitnim okolnostima slučaja. Takvo zastupanje ne smije biti u suprotnosti sa općim aktima Advokatske komore Bosne i Hercegovine.

(4) Advokat samo iz razloga predviđenih zakonom ili općim aktima Advokatske komore Bosne i Hercegovine može odbiti pružanje pravne pomoći stranci u slučaju kada je, na osnovu zakona, imenovan odlukom suda ili državnog organa.

(5) Kodeksom advokatske etike mogu se utvrditi i drugi razlozi zbog kojih advokat može da odbije pružanje pravne pomoći stranci.

Član 42.

Otkaz punomoći

(1) Advokat je dužan otkazati punomoć za zastupanje zbog razloga navedenih u članu 41. stav (2). ovog zakona.

(2) Po otkazivanju punomoći zastupanoj stranci advokat je dužan u periodu do 30 dana nastaviti pružati pravnu pomoć ako je potrebno da se od stranke otkloni kakva šteta, osim ako stranka nije imenovala drugog opunomoćenika ili se preduzimanju tih radnji izričito protivi.

(3) Advokat nije dužan postupati u saglasnosti sa odredbama stava (2). ovog člana, ako stranka otkáže punomoć, ali je advokat u momentu otkazivanja punomoći dužan u pismenoj formi obavijestiti stranku o svim relevantnim rokovima kao i zakazanim terminima u konkretnom predmetu.

Član 43.

Dužnosti advokata u odnosu na spise

(1) Advokat je dužan da redovno informiše svoje stranke o promjenama u predmetu.

(2) Advokat je dužan da stranci, nakon završenog zastupanja, na njen zahtjev, preda cjelokupni predmetni spis.

(3) Advokat je dužan čuvati spise zastupane stranke najmanje pet godina po pravomoćnom okončanju postupka, odnosno deset godina kada se zastupanje odnosilo na prava na nekretninama.

Član 44.

Obilježavanje podnesaka i isprava

Advokat je dužan na svakom svom podnesku i ispravi, vidljivo označiti da ih je on sačinio stavljanjem svog pečata i potpisa.

Član 45.

Odgovornost za dato mišljenje

Advokat ne može biti pozvan na krivičnu ili materijalnu odgovornost za svoje pravno mišljenje izraženo u pružanju pravne pomoći u postupku pred sudom ili drugim organima.

Član 46.

Određivanje pritvora

O određivanju pritvora advokatu ili advokatskom pripravniku sud je dužan bez odlaganja obavijestiti Advokatsku komoru Bosne i Hercegovine.

Član 47.

Pretnes advokatske kancelarije

(1) Pretnes arhive i advokatske kancelarije može odrediti sud, ako su za to ispunjeni uslovi predviđeni zakonom o krivičnom postupku. Pretnes se može vršiti samo u pogledu pismena i predmeta koji su izričito navedeni u naredbi o pretnesu.

(2) O pretnesu se mora obavijestiti Advokatska komora Bosne i Hercegovine ili advokatska komora iz člana 11. stav (1). tačke a) i b) ovog zakona, prema mjestu sjedišta advokata i pretnes se ne može obaviti ukoliko joj ne prisustvuje, uredno i blagovremeno obavješteni, ovlaštenu predstavnik komore iz ovog stava, osim ako se bez opravdanog razloga ne odazove blagovremenom pozivu da prisustvuje pretnesu.

(3) Pri provođenju pretnesa ne smije biti povrijeđena tajnost isprava i predmeta na štetu stranaka.

(4) Dokazi pribavljeni suprotno odredbama ovog člana, ne mogu se upotrijebiti u sudskom postupku protiv advokata i njegovih stranaka.

Član 48.

Reklamiranje advokata

Uslovi za dozvoljeno reklamiranje advokata, advokatskih kancelarija, zajedničkih advokatskih kancelarija ili advokatskih društava utvrđuju se Statutom Advokatske komore Bosne i Hercegovine.

Član 49.

Osiguranje od odgovornosti

(1) Advokati, zajedničke advokatske kancelarije i advokatska društva se obavezno osiguravaju od odgovornosti za štetu koja bi mogla nastati trećima u obavljanju advokatske djelatnosti.

(2) Minimalni iznos osiguranja i vrsta osigurane štete određuje se općim aktima Advokatske komore Bosne i Hercegovine.

(3) Advokatska komora može ugovoriti uslove osiguranja svojih članova od odgovornosti za štetu koja može nastati u toku obavljanja njihove djelatnosti.

(4) Advokat je dužan uredno produžavati osiguranje od odgovornosti.

POGLAVLJE II. ADVOKATSKE NAGRADE I NAKNADE

Član 50.

Advokatska tarifa

(1) Tarifa o nagradama i naknadi troškova za rad advokata (u daljem tekstu: Tarifa) određuje nagrade za rad i troškove nastale obavljanjem advokatske djelatnosti kao i primjenu i stupanje na snagu ove tarife.

(2) Skupština Advokatske komore Bosne i Hercegovine predlaže Tarifu koju odobrava Ministarstvo pravde Bosne i Hercegovine.

(3) Tarifa se objavljuje u „Službenom glasniku Bosne i Hercegovine“.

(4) Advokat ima pravo da zahtijeva i da primi nagradu za izvršeni rad i nadoknadu troškova nastalih u vezi sa radom, u skladu sa odredbama Tarife.

(5) Sudovi i drugi organi u odluci o troškovima postupka određivat će naknadu za pruženu pravnu pomoć stranci od strane advokata prema odredbama Tarife koja je važila u momentu pružanja pravne pomoći.

Član 51.

Ugovaranje nagrade prema uspjehu

(1) U imovinskopravnim stvarima advokati mogu sa strankom ugovoriti nagradu za rad i u razmjeru s uspjehom u postupku, odnosno u pravnim radnjama koje će za stranku poduzeti, u skladu sa Tarifom.

(2) Gornji iznos postotka nagrade koja se može ugovoriti utvrđuje se u Tarifi.

(3) Ugovor iz stava (1) ovog člana, valjan je samo ako je zaključen u pismenoj formi.

Član 52.

Novčana sredstva stranke

(1) Novčana sredstva zastupane stranke advokat može koristiti samo u skladu sa uputstvima stranke ili uz njeno izričito odobrenje.

(2) Advokati su obavezni voditi posebno računovodstvo za novčana sredstva stranke.

(3) Naknadu za pruženu pravnu pomoć, kao i troškove nastale u postupku, advokat može naplatiti iz gotovine koju je zastupana stranka položila kod njega ili iz gotovine koju je za zastupanu stranku primio, u skladu sa općim aktima Advokatske komore Bosne i Hercegovine.

(4) Na novčanim sredstvima koje primi u ime zastupane stranke, advokat ima pravo zaloga radi osiguranja naplate naknade i izdataka za zastupanje.

Član 53.

Besplatno pružanje pravne pomoći

Advokatska komora Bosne i Hercegovine je dužna osigurati besplatno pružanje pravne pomoći socijalno ugroženim osobama u pravnim stvarima u kojima te osobe ostvaruju prava koja su u vezi s njihovim položajem, kao i u drugim slučajevima predviđenim općim aktima Advokatske komore Bosne i Hercegovine.

POGLAVLJE III. OBLICI ORGANIZOVANJA ADVOKATSKE DJELATNOSTI

Odjeljak A. Advokatske kancelarije

Član 54.

Advokatska kancelarija

(1) Advokat može imati jednu advokatsku kancelariju na području Bosne i Hercegovine.

(2) Sjedište advokatske kancelarije je u mjestu na području Advokatske komore Bosne i Hercegovine ili advokatske komore iz člana 11. stav (1). tačke a) i b) ovog zakona, kod koje je advokat upisan u Imenik advokata.

(3) Advokat ima pravo promijeniti mjesto sjedišta kancelarije na području Advokatske komore Bosne i Hercegovine ili druge advokatske komore iz člana 11. stav (1) tačke a) i b) ovog zakona, s tim što je dužan odjaviti se kod advokatske komore na čijem području je imao sjedište kancelarije, a prijaviti sjedište kod advokatske komore na čijem području će biti novo sjedište kancelarije.

(4) Advokatska komora na čijem teritoriju se nalazi novo sjedište advokatske kancelarije, nakon upisa promjene sjedišta u Imeniku advokata, dužna je o tome obavijestiti advokatsku komoru ranijeg sjedišta u roku od 15 dana od dana izvršenog upisa.

Član 55.

Zajednička advokatska kancelarija

(1) Više advokata može imati zajedničku advokatsku kancelariju, o čemu zaključuju pismeni ugovor.

(2) Ugovor iz stava (1). ovog člana podnosi se Advokatskoj komori Bosne i Hercegovine, koja nakon što utvrdi da je ugovor u skladu sa zakonom, Statutom, Kodeksom advokatske etike te drugim aktima Advokatske komore Bosne i Hercegovine, upisuje zajedničku advokatsku kancelariju u evidencije ili imenik te komore.

(3) Zajednička advokatska kancelarija može početi s radom danom upisa u evidenciju ili imenik Advokatske komore Bosne i Hercegovine. Advokatske komore iz člana 11. stav (1). tačke a) i b) ovog zakona, kod kojeg je upisana zajednička advokatska kancelarija, o tome obavještavaju Advokatsku komoru Bosne i Hercegovine.

(4) Zajednička advokatska kancelarija mora imati naziv i pečat.

(5) U nazivu zajedničke advokatske kancelarije i pečatu upisuje se: zajednička advokatska kancelarija, imena i prezimena advokata koji su se udružili i sjedište zajedničke advokatske kancelarije.

Član 56.

Odgovornost advokata u zajedničkoj advokatskoj kancelariji

Odgovornost i garancije advokata u zajedničkoj advokatskoj kancelariji su lične.

Odjeljak B. Advokatska društva

Član 57.

Advokatska društva

(1) Advokatsko društvo, kao pravna osoba, se osniva u skladu sa zakonom kojim se uređuje osnivanje, poslovanje i prestanak privrednih društava/ preduzeća i to u onom obliku kojim se osigurava osobna neograničena solidarna odgovornost članova za obaveze društva.

(2) Rad advokatskog društva je ograničen na obavljanje advokatske djelatnosti.

(3) Samo advokati mogu biti članovi advokatskog društva.

(4) Obavljanje advokatske djelatnosti u okviru advokatskog društva može se povjeriti samo članovima advokatskog društva, advokatima zaposlenim u advokatskom društvu ili advokatskim pripravnicima u advokatskom društvu.

(5) Prava, obaveze i odgovornosti, koje su ovim zakonom predviđene za advokate u izvršavanju njihove djelatnosti, odnose se i na advokate koji su u ugovornom odnosu u advokatskom društvu.

Član 58.

Uređivanje prava i obaveza

Pismenim ugovorom ili odlukom o osnivanju društva moraju biti uređena prava i obaveze članova društva, prava i obaveze ostalih članova društva u slučaju smrti člana ili njegovog istupanja iz društva, kao i prava nasljednika umrlog člana društva.

Član 59.

Garancija nezavisnosti

Niti jedan akt advokatskog društva ne smije dovesti u pitanje nezavisnosti advokata koji pružaju pravnu pomoć.

Član 60.

Osnivanje advokatskog društva

(1) Za osnivanje advokatskog društva, advokati osnivači su dužni pribaviti prethodnu privremenu saglasnost Advokatske komore Bosne i Hercegovine koja ocjenjuje da li je ugovor o osnivanju u skladu sa zakonom, Statutom, Kodeksom advokatske etike. Bez te saglasnosti društvo se ne može upisati u Imenik advokatskih društava Advokatske komore Bosne i Hercegovine. Advokatske komore iz člana 11. stav (1) tačke a) i b) ovog zakona, dužne su o osnivanju i upisu u imenik advokatskih društava, obavijestiti Advokatsku komoru Bosne i Hercegovine, u cilju njihovog evidentiranja.

(2) Advokatsko društvo je dužno obavijestiti Advokatsku komoru Bosne i Hercegovine ili advokatske komore iz člana 11. stav (1) tačke a) i b) ovog zakona, o izvršenom upisu u Registar društava nadležnog suda u roku od osam dana po primitku obavijesti i rješenja nadležnog suda o upisu.

(3) Advokatske komore iz stava (2). ovog člana, dužne su novoosnovano advokatsko društvo upisati u Imenik advokatskog društva u daljem roku od osam dana.

Član 61.

Upis advokatskog društva u Imenik advokatskih društava

Advokatsko društvo i njegovi advokati ne mogu pružati pravnu pomoć prije nego što bude izvršen upis advokatskog društva u Imenik advokatskih društava Advokatske komore Bosne i Hercegovine .

Član 62.

Zabrana rada advokatskom društvu

(1) Ukoliko Upravni odbor Advokatske komore Bosne i Hercegovine utvrdi da aktivnosti advokatskog društva, ugovori sklopljeni između advokatskog društva i članova ili zaposlenih u društvu ili uvjeti pod kojima advokati obavljaju svoje dužnosti, krše odredbe Zakona o advokaturi, Statuta Advokatske komore Bosne i Hercegovine, Kodeksa advokatske etike, ili bilo kojeg općeg akta advokatskih komora Federacije Bosne i Hercegovine, Republike Srpske i Brčko Distrikta, može rješenjem zabraniti rad društva te ga brisati iz Imenika advokatskih društava.

(2) Advokatsko društvo brisat će se iz Imenika advokatskih društava i ukoliko advokatsko društvo ne izvršava djelatnost u kontinuitetu dužem od tri mjeseca, ukoliko se ustanovi da advokatsko društvo obavlja druge aktivnosti izvan svoje djelatnosti ili ukoliko su članu advokatskog društva ili advokatima zaposlenim u društvu izrečene disciplinske mjere usljed čega postupanje i poslovanje advokatskog društva ozbiljno šteti ugledu advokature.

(3) U postupku za brisanje advokatskog društva iz Imenika advokatskih društava shodno se primjenjuju odredbe ovog zakona i opštih akata Advokatske komore Bosne i Hercegovine, kojima je uređeno izricanje disciplinske mjere brisanja iz Imenika advokata.

(4) Rješenje o zabrani obavljanja djelatnosti advokatskom društvu je upravni akt protiv koga se može pokrenuti upravni spor.

(5) Advokatska komora Bosne i Hercegovine može rješenjem odlučiti da se do pravomoćnosti rješenja iz stava 1. ovog člana, obustavi rad društva, a žalba protiv takvog rješenja ne odgađa njegovo izvršenje.

(6) O donošenju rješenja iz stava (1) i (4) ovog člana, Advokatska komora Bosne i Hercegovine je dužna bez odgađanja obavijestiti nadležni registarski sud radi provođenja odgovarajućeg postupka brisanja iz registra pravnih osoba.

(7) Advokatsko društvo prestaje sa radom sa danom brisanja iz Imenika advokatskih društava.

(8) Nakon što je advokatsko društvo prestalo da obavlja svoju djelatnost u skladu sa odredbama ovog člana, Advokatska komora Bosne i Hercegovine će

preduzeti sve neophodne mjere radi zaštite interesa onih stranaka koje je brisano društvo zastupalo.

Član 63.

Nastavak obavljanja advokatske djelatnosti

Član advokatskog društva ili zaposleni advokat u društvu brisanom iz Imenika advokatskih društava, a kojem nije izrečena disciplinska mjera brisanja iz Imenika advokata može nastaviti obavljati djelatnost advokata.

Član 64.

Odgovornost advokata u advokatskim društvima

Za pruženu pravnu pomoć strankama advokati u advokatskim društvima odgovaraju po općim pravilima o odgovornosti. Članovi advokatskog društva solidarno odgovaraju za obaveze društva i advokata koji u njemu obavljaju poslove pravne pomoći, nastale u vezi s pružanjem te pomoći.

Član 65.

Odnos prema advokatskoj komori

U pogledu čuvanja advokatske tajne, disciplinske odgovornosti i odnosa prema Advokatskoj komori Bosne i Hercegovine te njenim organima, advokati u advokatskim društvima imaju ista prava i odgovornosti kao i advokati koji imaju vlastite kancelarije.

Član 66.

Zasnivanje radnog odnosa

(1) Advokati, zajednička advokatska kancelarija i advokatska društva mogu zaključivati ugovore o radu sa osobama koje će obavljati administrativne, tehničke, finansijske i druge poslove, a advokatsko društvo i sa advokatima.

(2) U odnosu na prava i obaveze zaposlenih kod advokata, u zajedničkoj advokatskoj kancelariji i u advokatskom društvu, koja nisu regulisana ugovorom o radu, primjenjuju se odredbe zakona kojim se regulišu radni odnosi, kao i odredbe kolektivnog ugovora.

(3) Poslove iz stava (1). ovog člana, mogu kod advokata obavljati i osobe koje su sa advokatom, zajedničkom advokatskom kancelarijom ili advokatskim društvom zaključile ugovor o djelu.

Član 67.

Otvaranje pisarnica

Advokatske kancelarije, zajedničke advokatske kancelarije ili advokatska društva pored registrovanog sjedišta mogu imati više pisarnica na cijelom teritoriju Bosne i Hercegovine u skladu sa zakonom i propisima, uz uslov da u svakoj pisarnici stalno radi barem jedan advokat.

Odjeljak C. Specijalizacija advokata i advokatskih društava

Član 68. Specijalizacija advokata

(1) Advokat može zahtijevati da mu se prizna specijalnost u određenoj oblasti prava.

(2) Statutom Advokatske komore Bosne i Hercegovine odredit će se oblasti iz kojih se advokatu može priznati specijalnost.

(3) O zahtjevu za priznavanje specijalnosti odlučuje organ Advokatske komore Bosne i Hercegovine određen Statutom.

(4) Smatrat će se da ispunjava uslove za priznavanje specijalnosti advokat koji je najmanje 5 godina s uspjehom obavljao pravne poslove u oblasti iz koje traži specijalnost, odnosno čiji radovi na osnovu kojih je u toj oblasti stekao naučni stepen magistra prava ili doktorat pravnih nauka ili čiji drugi objavljeni radovi predstavljaju značajniji prilog unapređenju pravne nauke ili prakse.

(5) Protiv rješenja kojim se odbija zahtjev za priznavanje specijalnosti može se podnijeti žalba najvišem organu Advokatske komore Bosne i Hercegovine.

(6) Priznata specijalnost upisuje se u imenik advokata i može se istaknuti u nazivu advokatske kancelarije.

Član 69. Specijalizirana advokatska društva

(1) Advokatska društva se već prilikom registracije mogu opredijeliti za pružanje pravne pomoći samo u određenoj pravnoj oblasti. U tom se slučaju specijalizacija društva obavezno ističe u njegovom nazivu.

(2) Advokatskom društvu priznat će se specijalizacija ako je barem kojem od advokata članova društva ili advokata koji rade u društvu ona priznata u skladu s odredbama člana 68. ovog zakona.

DIO PETI – PRESTANAK PRAVA NA OBAVLJANJE ADVOKATURE I PRIVREMENA ZABRANA OBAVLJANJA ADVOKATSKE DJELATNOSTI

Član 70. Prestanak prava na obavljanje advokature

(1) Advokatu prestaje pravo na obavljanje advokatske djelatnosti:

- a) ako izgubi državljanstvo Bosne i Hercegovine, u kojem slučaju će se brisanje izvršiti sa danom pravosnažnosti odluke kojom je utvrđen gubitak državljanstva,

- b) ako izgubi radnu sposobnost, u kojem slučaju će se brisanje izvršiti sa danom pravosnažnosti odluke kojom je utvrđen gubitak radne sposobnosti,
- c) ako advokat umre, u kojem slučaju će se brisanje izvršiti sa danom smrti advokata,
- d) ako postane trajno zdravstveno nesposoban za obavljanje advokatske djelatnosti, u kojem slučaju će se brisanje izvršiti sa danom pravosnažnosti odluke nadležne zdravstvene ustanove kojom se utvrđuje ili konstatuje zdravstvena nesposobnost,
- e) ako mu je izrečena mjera zabrane obavljanja advokatske djelatnosti, u kojem slučaju će se brisanje izvršiti sa danom pravosnažnosti odluke suda ili drugog nadležnog organa,
- f) ako je na osnovu izrečene disciplinske mjere izgubio pravo na obavljanje advokatske djelatnosti, u kojem slučaju će se brisanje izvršiti sa danom pravosnažnosti odluke kojom je izrečena disciplinska mjera,
- g) ako izjavi da više neće obavljati advokatsku djelatnost, u kojem slučaju će se brisanje izvršiti sa danom pravosnažnosti odluke o brisanju,
- h) ako duže od šest mjeseci bez opravdanog razloga ne obavlja djelatnost advokata, u kojem slučaju će se brisanje izvršiti sa danom u koji se utvrdi da je prestao obavljati djelatnost advokata,
- i) ako zasnuje radni odnos, izuzev sa advokatskim društvom, u kojem slučaju će se brisanje izvršiti sa danom zasnivanja tog radnog odnosa,
- j) ako je osuđen na безусловnu kaznu zatvora u trajanju od šest mjeseci ili duže, u kojem slučaju će se brisanje izvršiti sa danom pravosnažnosti osuđujuće presude.

(2) U slučajevima iz stava (1). tačke h). i i). ovog člana, advokatu prestaje pravo obavljanja advokatske djelatnosti danom dostavljanja pravomoćne odluke nadležnog tijela Advokatske komore Bosne i Hercegovine.

Član 71.

Privremena zabrana vršenja advokature

(1) Advokatu će se privremeno zabraniti vršenje advokatske djelatnosti, ako je protiv njega određen pritvor, odnosno ako je stupio na izdržavanje kazne zatvora izrečene u trajanju do šest mjeseci.

(2) Advokatu se može privremeno zabraniti vršenje advokatske djelatnosti ako je protiv njega pokrenut krivični postupak za djelo koje ga čini nedostojnim za vršenje advokatske djelatnosti; ako je protiv njega pokrenut disciplinski postupak za težu povredu dužnosti; ako se krivični, odnosno disciplinski postupak protiv njega ne može uspješno provesti bez privremene zabrane vršenja njegove djelatnosti; ako je u vršenju

advokatske djelatnosti više od tri puta, odnosno dva puta u kontinuitetu, izvršena povreda dužnosti ili ugleda advokature, bez obzira na težinu pojedinačne povrede.

(3) Rješenjem o privremenoj zabrani, utvrđuje se tačan vremenski period tokom kojeg će advokatu biti zabranjeno da obavlja djelatnost advokata.

Član 72. Donošenje odluka

(1) O prestanku prava na obavljanje advokatske djelatnosti odluku donosi Advokatska komora Bosne i Hercegovine, na isti način i po istom postupku kao i prilikom upisa u Imenik advokata.

(2) Ukoliko u pogledu uslova iz stava (1) ovog člana, advokatska komora Federacije Bosne i Hercegovine, advokatska komora Republike Srpske ili advokatska komora Brčko Distrikta, ne donesu odluku iz stava (1) ovog člana, iako je upoznata sa nastupanjem nekog od uslova za prestanak prava na obavljanje advokatske djelatnosti, Advokatska komora Bosne i Hercegovine je ovlaštena da neposredno donese rješenje o prestanku vršenja advokatske djelatnosti i brisanju iz Imenika advokata navedenih advokatskih komora iz stava (2) ovog člana.

(3) O privremenoj zabrani vršenja advokatske djelatnosti odlučuje organ određen Statutom Advokatske komore Bosne i Hercegovine, protiv koje se može uložiti žalba Advokatskoj komori Bosne i Hercegovine u roku od 15 dana od prijema prvostepenog rješenja.

(4) Protiv konačnog rješenja Advokatske komore Bosne i Hercegovine donesene po odredbama ovog člana može se pokrenuti upravni spor kod Suda Bosne i Hercegovine.

(5) Nakon donošenja rješenja o prestanku prava na obavljanje advokatske djelatnosti ili privremenoj zabrani vršenja advokatske djelatnosti Advokatska komora Bosne i Hercegovine će preduzeti sve neophodne mjere radi zaštite interesa stranke koja je zastupana po tom advokatu.

(6) U rješenju iz stava (3) ovog člana, određuje se advokat-preuzimalac poslova, koji će za vrijeme trajanja zabrane obavljati samo one radnje usljed čijeg nevršenja bi mogla nastupiti šteta za stranku.

Član 73. Obaveza obavještanja

Organ koji je protiv advokata ili advokatskog pripravnika:

- a) pokrenuo krivični ili prekršajni postupak, ili
- b) utvrdio gubitak radne ili poslovne sposobnosti ili gubitak državljanstva,
- c) utvrdio gubitak opće zdravstvene sposobnosti,

dužan je u roku od osam dana o tome obavijestiti Advokatsku komoru Bosne i Hercegovine.

Član 74.

Nastavak bavljenja advokatorum nakon sticanja prava na penziju

Advokatu koji je ostvario pravo na starosnu invalidsku ili porodičnu penziju, a nastavi, odnosno započne da obavlja advokatsku djelatnost na osnovu koje je osiguran, penzija se ne isplaćuje za to vrijeme.

Član 75.

Privremeno odsustvo advokata

(1) Ne smatra se prestankom bavljenja advokaturom privremeno odsustvo advokata koji je izabran za poslanika ili delegata u trajanju poslaničkog odnosno delegatskog mandata, kao ni odsustvo advokata koji je izabran ili postavljen na javnu funkciju u organu uprave bilo kojeg nivoa vlasti dok mu traje mandat na toj funkciji.

(2) Advokat koji želi da koristi pravo na privremeno odsustvo iz stava (1) ovog člana, dužan je da o tome obavijesti nadležni organ određen statutom Advokatske komore Bosne i Hercegovine.

DIO ŠESTI – ADVOKATSKI PRIPRAVNICI

Član 76.

Osposobljavanje advokatskih pripravnika

(1) Advokatski pripravnik se osposobljava za samostalno obavljanje advokatske djelatnosti i stručno osposobljava radi polaganja pravosudnog ispita, radom na pravnim poslovima u advokatskoj kancelariji, zajedničkoj kancelariji ili advokatskom društvu.

(2) Advokatski pripravnik ima advokata – principala koji je upisan u Imenik advokata i koji obavlja advokatsku djelatnost duže od jedne godine.

Član 77.

Sticanje svojstva advokatskog pripravnika

(1) Svojstvo advokatskog pripravnika stiče se upisom u Imenik advokatskih pripravnika Advokatske komore Bosne i Hercegovine, po istom postupku predviđenom za upis u Imenik advokata. Pravo na upis ima ona osoba koja ispunjava slijedeće uslove:

- a) da je državljanin Bosne i Hercegovine;
- b) da je diplomirao na pravnom fakultetu na teritoriji Bosne i Hercegovine ili da je diplomirao na bilo kojem pravnom fakultatu u bivšoj Socijalističkoj

Federativnoj Republici Jugoslaviji do 22. maja 1992. godine, a ako je diplomirao na pravnom fakultetu u nekoj drugoj državi ovaj uslov stiče nakon nostrifikacije diplome od strane nadležnog organa.

- c) da posjeduje dokaz da će zasnovati radni odnos sa advokatom koji ispunjava uslove iz člana 76. stav (2) ovog zakona.

Član 78.

Prava i dužnosti advokatskih pripravnika

(1) Advokatski pripravnik zasniva radni odnos i ima ista prava i dužnosti kao i pripravnik zaposlen u pravosudnim i upravnim organima.

(2) Odredbe ovog zakona o upisu u Imenik advokata, pravima i dužnostima advokata, čuvanju advokatske tajne, o privremenoj zabrani odnosno prestanku prava na vršenje advokatske djelatnosti shodno se primjenjuju i na advokatske pripravnike.

Član 79.

Brisanje iz Imenika advokatskih pripravnika

Advokatski pripravnici brišu se iz Imenika advokatskih pripravnika:

- a) prestankom ugovora o radu,
- b) na zahtjev advokatskog pripravnika,
- c) izricanjem disciplinske mjere kojom se advokatskom pripravniku zabranjuje obavljanje djelatnosti,
- d) smrću advokatskog pripravnika,
- e) ako bez opravdanog razloga ne izvršava djelatnost advokatskog pripravnika neprekidno duže od 60 dana,
- f) ako ne položi pravosudni ispit ni nakon isteka dvije godine po sticanju uslova za polaganje ispita, ili
- g) ako se u roku od dvije godine od dana položenog pravosudnog ispita ne upiše u Imenik advokata.

Član 80.

Udruživanje u organizaciju advokatskih pripravnika

(1) Advokatski pripravnici se obavezno udružuju u Organizaciju advokatskih pripravnika u okviru Advokatske komore Bosne i Hercegovine.

(2) Organizacija advokatskih pripravnika učestvuje u radu organa Advokatske komore Bosne i Hercegovine sa pravima i obavezama određenim ovim zakonom i važećim Statutom.

Član 81.

Produženje trajanja statusa advokatskog pripravnika

Na zahtjev advokata-principala i advokatskog pripravnika, nadležan organ određen statutom Advokatske komore Bosne i Hercegovine, ukoliko je zahtjev

opravdan, može produžiti trajanje statusa advokatskog pripravnika za još dvije godine.

DIO SEDMI – DISCIPLINSKA ODGOVORNOST ADVOKATA I ADVOKATSKIH PRIPRAVNIKA

Član 82.

Individualna odgovornost

(1) Advokati, koji obavljaju djelatnost advokata kao pojedinci, u zajedničkoj advokatskoj kancelariji ili advokatskom društvu kao i advokatski pripravnici individualno su odgovorni za savjesno vršenje svoje djelatnosti i čuvanje ugleda advokature.

(2) Povredom obaveze smatrat će se svako ponašanje suprotno obavezama utvrđenim ovim zakonom i općim aktima Advokatske komore Bosne i Hercegovine.

Član 83.

Nadležnost za pokretanje disciplinskog postupka

(1) Statutom Advokatske komore Bosne i Hercegovine utvrđuju se teže i lakše povrede dužnosti advokata i advokatskih pripravnika u izvršavanju njihove djelatnosti i čuvanju ugleda profesije, kao i vrste disciplinskih mjera.

(2) Statutom i Pravilnikom o disciplinskoj odgovornosti Advokatske komore Bosne i Hercegovine određuju se organi koji će pokretati i voditi disciplinski postupak i način vođenja tog postupka.

(3) Članove disciplinskih organa Advokatske komore Bosne i Hercegovine imenuje Skupština te komore.

(4) Član disciplinskog organa može biti samo član Advokatske komore Bosne i Hercegovine sa najmanje deset godina radnog iskustva nakon položenog pravosudnog ispita.

(5) Svako ima pravo pokrenuti disciplinski postupak protiv advokata podnošenjem prijave disciplinskom tužiocu Advokatske komore Bosne i Hercegovine.

(6) Disciplinski tužilac Advokatske komore Bosne i Hercegovine, nakon što ocijeni da prijava ukazuje na povredu disciplinske odgovornosti, podiže optužnicu i predmet upućuje disciplinskom sudu Advokatske komore Bosne i Hercegovine na odlučivanje.

(7) Ministarstvo pravde Bosne i Hercegovine i disciplinski tužilac Advokatske komore Bosne i Hercegovine pokreću postupak za utvrđivanje disciplinske odgovornosti advokata ili advokatskog pripravnika podnošenjem optužnice neposredno disciplinskom sudu Advokatske komore Bosne i Hercegovine, koju u postupku zastupa disciplinski tužilac Advokatske komore Bosne i Hercegovine.

(8) Disciplinski postupak protiv advokata i advokatskih pripravnika utvrđen općim aktima Advokatske komore Bosne i Hercegovine će uključivati pravo da bude obaviješten o činjeničnom i pravnom sadržaju optužnog akta, pravo na pravičan postupak, pravo na prisustvovanje bilo kojem ročištu, pravo da se brani protiv optužbi sa pravnim zastupnikom po izboru, pravo na pokretanje postupka preispitivanja odluke disciplinskog organa Advokatske komore Bosne i Hercegovine pred nadležnim sudom.

(9) Disciplinski postupak mora biti pravičan i transparentan, a pri izricanju disciplinske mjere mora biti uvažen princip proporcionalnosti.

(10) Prilikom izricanja disciplinskih mjera za disciplinski prekršaj, disciplinski organi uzimaju u obzir slijedeće:

- a) težinu izvršenog disciplinskog prekršaja i njegove posljedice;
- b) stepen odgovornosti;
- c) okolnosti pod kojima je izvršen disciplinski prekršaj;
- d) prethodni rad i ponašanje prekršioca;
- e) bilo koju drugu okolnost koja može uticati na težinu i vrstu disciplinskih mjera; i
- f) da se disciplinske mjere brisanja iz Imenika izriču za teže disciplinske prekršaje ako težina tog prekršaja jasno upućuje da je prekršilac nepodoban da vrši advokatsku djelatnost ili djelatnost advokatskog pripravnika.

Član 84.

Teže i lakše povrede urednog obavljanja advokature

(1) Težom povredom dužnosti urednog obavljanja djelatnosti i čuvanja ugleda advokature smatra se svako teže narušavanje dužnosti, ugleda i Kodeksa advokatske etike, a naročito:

- a) očigledno nesavjesno obavljanje djelatnosti advokata ili advokatskog pripravnika,
- b) bavljenje poslovima koji su nespojivi sa ugledom i nezavisnošću advokature,
- c) povreda dužnosti čuvanja advokatske tajne, i
- d) zahtijevanje naknade veće od propisane Tarifom ili od ugovorene.

(2) Lakše povrede dužnosti urednog izvršavanja djelatnosti i čuvanja ugleda advokature su sve povrede koje u sebi ne sadrže elemente teže povrede urednog obavljanja djelatnosti i čuvanja ugleda advokature.

Član 85.

Disciplinske mjere

U postupku za utvrđivanje odgovornosti za povredu advokatske dužnosti, advokatu ili advokatskom pripravniku mogu se izreći sledeće disciplinske mjere:

- a) Za lakše povrede dužnosti:

- 1) opomena,
 - 2) javna opomena,
 - 3) novčana kazna, koja ne može preći 2.000,00 KM za advokate i 1.000,00 KM za advokatske pripravnike;
- b) Za teže povrede dužnosti:
- 1) novčana kazna, koja ne može preći 10.000,00 KM za advokate i 5.000,00 KM za advokatske pripravnike;
 - 2) zabrana obavljanja djelatnosti u trajanju od šest mjeseci do pet godina, i
 - 3) brisanje iz Imenika advokata ili Imenika advokatskih pripravnika u vremenu trajanja zabrane obavljanja djelatnosti.

Član 86.

Disciplinski postupak

(1) Prvostepeni disciplinski postupak provodi se pred disciplinskim sudom Advokatske komore Bosne i Hercegovine.

(2) Disciplinski tužilac Advokatske komore Bosne i Hercegovine može uvijek preuzeti vođenje disciplinskog postupka pred disciplinskim sudom Advokatske komore Federacije BiH, Republike Srpske ili Brčko Distrikta, a taj postupak može i pokrenuti.

(3) Protiv prvostepenog rješenja iz stava (2) ovog člana, o utvrđivanju disciplinske odgovornosti može se uložiti žalba disciplinskom sudu Advokatske komore Bosne i Hercegovine u roku od 15 dana od dana prijema pismenog otpravka odluke.

(4) Protiv konačnog rješenja disciplinskog suda Advokatske komore Bosne i Hercegovine iz stava (1) i (3) ovog člana, kojim je advokatu ili advokatskom pripravniku izrečena disciplinska mjera može se pokrenuti upravni spor pred Sudom Bosne i Hercegovine.

(5) Advokatske komore Federacije Bosne i Hercegovine i Republike Srpske su obavezne da u pismenoj formi podnose redovan izvještaj nadležnom organu Advokatske komore Bosne i Hercegovine o broju zahtjeva za pokretanje disciplinskih postupaka, broju pokrenutih postupaka pred disciplinskim sudom navedenih komora kao i o rezultatima tih postupaka.

Član 87.

Izvršnost odluka disciplinskog organa

Pravomoćna odluka nadležnog disciplinskog organa kojom je izrečena novčana kazna ima snagu izvršne isprave, a Statutom Advokatske komore Bosne i Hercegovine se uređuje način njenog izvršenja.

Član 88.

Zastarjelost pokretanja disciplinskog postupka

(1) Pokretanje disciplinskog postupka zbog povrede dužnosti i ugleda advokature protiv advokata koji obavljaju djelatnost advokata kao pojedinci, u zajedničkoj advokatskoj kancelariji ili advokatskom društvu kao i advokatskih pripravnika ne može se preduzeti kad protekne:

- a) dvije godine od izvršenja lakše povrede dužnosti, i
- b) četiri godine od izvršenja teže povrede dužnosti.

(2) Ako povreda ima obilježje krivičnog djela zastarjelost pokretanja disciplinskog postupka izjednačena je sa zastarijevanjem pokretanja krivičnog postupka prema krivičnom zakonu.

Član 89.

Zastarjelost izvršenja disciplinskih mjera

Zastarjelost izvršenja disciplinskih mjera nastupa po isteku dvije godine od dana pravomoćnosti odluke kojom je disciplinska mjera izrečena.

Član 90.

Tok i prekid zastarjelosti disciplinskog postupka

(1) Zastarjelost se prekida svakom radnjom koja se preduzima radi pokretanja disciplinskog postupka ili postupka izvršenja disciplinske mjere.

(2) Sa svakim prekidom zastarijevanje počinje ponovo da teče, ali zastarjelost nastaje u svakom slučaju kad protekne dvaput onoliko vremena koliko je ovim zakonom određeno za zastarjelost pokretanja disciplinskog postupka, odnosno izvršenja disciplinske mjere.

Član 91.

Pravna pomoć i službena saradnja

Na zahtjev organa Advokatske komore Bosne i Hercegovine, sudovi i drugi organi dužni su dostaviti spise ili pismena obavještenja koja su od značaja za vođenje disciplinskog postupka, radi utvrđivanja odgovornosti i povredi advokatske dužnosti, odnosno dužnosti advokatskog pripravnika i ugleda advokatske djelatnosti.

DIO OSMI – FINANSIRANJE ADVOKATSKE KOMORE

Član 92.

Izvori finansiranja

(1) Advokatska komora Bosne i Hercegovine se finansira isključivo iz vlastitih sredstava i to:

- a) redovnog članskog doprinosa,
- b) naknade za upis u Imenik advokata,
- c) drugih izvora, kao što su novčane kazne, doprinosi i slično.

(2) Sredstva koja obezbjede državni organi i institucije ne mogu se koristiti za finansiranje Advokatske komore Bosne i Hercegovine, ukoliko bi korištenje ovih sredstava na bilo koji način moglo ugroziti princip nezavisnosti i samostalnosti advokature.

Član 93.

Visina naknade za upis u imenik advokata

Upravni odbor Advokatske komore Bosne i Hercegovine određuje visinu naknade za upis u imenike shodno članu 22. stav (1) tačke e) ovog zakona, kao i članarine koja je potrebna za finansiranje Advokatske komore Bosne i Hercegovine.

Član 94.

Plan finansiranja

(1) Sredstva potrebna za finansiranje rada Advokatske komore Bosne i Hercegovine utvrđuju se godišnjim finansijskim planom. Svaka od advokatskih komora iz člana 11. stav (1) tačke a) i b) ovog zakona, učestvuje u finansiranju Advokatske komore Bosne i Hercegovine, na osnovu odluka svojih nadležnih organa, srazmjerno broju advokata koji imaju sjedište kancelarija na njihovom području.

(2) Naknada za upis uplaćuje se direktno na račun Advokatske komore Bosne i Hercegovine.

DIO DEVETI – PRIJELAZNE I ZAVRŠNE ODREDBE

Član 95.

Upis u Advokatsku komoru Bosne i Hercegovine advokata i advokatskih pripravnika upisanih u postojeće advokatske komore

(1) Advokati i advokatski pripravnici kojima je priznato pravo obavljanja djelatnosti po osnovu upisa u imenike advokatskih komora iz člana 11. stav (1) tačka a) i b) ovog zakona, stiču pravo upisa u Imenik Advokatske komore Bosne i Hercegovine na osnovu podnesenog zahtjeva i prethodnog rješenja o upisu u advokatske komore iz člana 11. stav (1) tačke a) i b) ovog zakona.

(2) Zahtjev iz stava (1) ovog člana, podnosi se bilo kada nakon osnivanja Skupštine Advokatske komore Bosne i Hercegovine i njenih organa iz člana 12. ovog zakona.

Član 96.

Konstituirajuća skupština, Koordinaciono tijelo i Izborna skupština Advokatske komore Bosne i Hercegovine

(1) U roku od šest mjeseci od dana stupanja na snagu ovog zakona održaće se konstituirajuća sjednica Skupštine Advokatske komore Bosne i Hercegovine (Konstituirajuća skupština). Konstituirajuću skupštinu sačinjavaju svi delagati skupština Advokatske komore Federacije Bosne i Hercegovine i Advokatske komore

Republike Srpske. Broj članova Konstituirajuće skupštine formira se na način da iz ukupnog broja članova svih advokata i advokatskih pripravnika u Bosni i Hercegovini na svakih 10 advokata i advokatskih pripravnika biraju jednog delegata za Konstituirajuću skupštinu.

(2) Na Konstituirajućoj skupštini bit će izabrano Koordinirajuće tijelo Advokatske komore Bosne i Hercegovine (Koordinaciono tijelo) sa ograničenim mandatom do druge Skupštine Advokatske komore Bosne i Hercegovine.

(3) U roku od godine dana nakon stupanja na snagu ovog zakona održat će se druga izborna sjednica Skupštine Advokatske komore Bosne i Hercegovine na kojoj će biti izabrani svi organi Advokatske komore Bosne i Hercegovine u skladu sa članom 12 ovog zakona (Izborna skupština).

Član 97.

Održavanje Konstituirajuće skupštine

(1) Konstituirajuća skupština bit će izabrana na profesionalnom principu vodeći računa o proporcionalnoj i teritorijalnoj zastupljenosti svih advokata i advokatskih pripravnika u Bosni i Hercegovini.

(2) Konstituirajuća skupština bira predsjedavajućeg i tri potpredsjednika sa mandatom od dvije, odnosno četiri godine.

(3) Konstituirajuća skupština vrši izbor Koordinacionog tijela na način da se iz ukupno utvrđenog broja prisutnih delegata Konstituirajuće skupštine bira najmanje po jedan član na deset delegata, vodeći računa o proporcionalnoj i teritorijalnoj zastupljenosti svih advokata i advokatskih pripravnika u Bosni i Hercegovini. Predsjednik i tri potpredsjednika skupštine ulaze u članstvo Koordinacionog tijela.

(4) Konstituirajuća skupština na provoj sjednici utvrđuje osnovne principe i smjernice rada svoga Koordinacionog tijela.

(5) Na prijedlog svog Koordinacionog tijela Konstituirajuća skupština utvrđuje osnovne principe Statuta, Kodeksa advokatske etike i Pravilnika o disciplinskoj odgovornosti, Poslovnika o radu Skupštine, Poslovnika o radu Upravnog odbora, Pravilnika o upisu i vođenju Imenika advokata Advokatske komore Bosne i Hercegovine, kao i svih ostalih općih akata Advokatske komore Bosne i Hercegovine.

(6) Statut, Kodeks advokatske etike, kao i prijedlozi i nacrti svih ostalih općih akata Advokatske komore Bosne i Hercegovine bit će harmonizirani sa međunaordnim standardima Ujedinjenih naroda Vijeća Europe, Europske unije

(7) Na prijedlog svog Koordinacionog tijela Konstituirajuća skupština utvrđuje osnovne principe saradnje sa Advokatskom komorom Federacije Bosne i Hercegovine i Advokatskom komorom Republike Srpske.

(8) Konstituirajuća skupština do okončanja Izborne skupštine komunicira i saraduje sa Ministarstvom pravde Bosne i Hercegovine preko Koordinacionog tijela, a nakon toga Advokatska komora Bosne i Hercegovine komunikaciju i saradnju sa Ministarstvom pravde obavlja preko izabраниh organa u skladu sa članom 12. ovog zakona.

Član 98.

Koordinaciono tijelo

(1) Mandat svih članova Koordinacionog tijela ograničen je za period od njegovog osnivanja na Osnivačkoj skupštini do okončanja Izborne skupštine kada prestaje da postoji po sili ovog zakona.

(2) Koordinaciono tijelo u svom sastavu imat će najmanje 15 a ne više od 20 članova.

(3) U svrhu njihovog usvajanja na Izornoj skupštini, Koordinaciono tijelo priprema i predlaže nacрте Statuta, Kodeksа advokatske etike i Pravilnika o disciplinskoj odgovornosti, Poslovnika o radu Skupštine, Poslovnika o radu Upravnog odbora, Pravilnika o upisu i vođenju Imenika advokata Advokatske komore Bosne i Hercegovine, kao i svih ostalih općih akata Advokatske komore Bosne i Hercegovine, u skladu sa ovim zakonom.

(4) Koordinaciono tijelo će izraditi nacрте i predložiti Izornoj skupštini usvajanje Statuta, Kodeksа advokatske etike, kao i svih ostalih općih akata Advokatske komore Bosne i Hercegovine.

(5) Koordinaciono tijelo predlaže osnivanje odbora i drugih tijela Advokatske komore Bosne i Hercegovine (Odbor za saradnju sa entitetskim advokatskim komorama, Odbor za status advokata i advokatskih pripravnika, Odbor za ustav i zakonodavstvo, Odbor za međunarodnu saradnju, Odbor za ljudska prava i po potrebi druga tijela).

(6) U obavljanju zakonskih obaveza Koordinaciono tijelo komunicira i saraduje sa Ministarstvom pravde Bosne i Hercegovine koje saziva i organizuje njegove sjednice.

(7) Na prvoje sjednici prisutni članovi Koordinacionog tijela biraju svoga predsjedavajućeg i njegovog prvog i drugog zamjenika. U slučaju nemogućnosti prisustvovanja sjednicama Koordinacionog tijela predsjedavajućeg mijenja prvi zamjenik, odnosno prvog zamjenika mijenja drugi zamjenik.

(8) Koordinaciono tijelo usvaja Poslovnik o radu većinom prisutnih glasova.

(9) Kvorum Koordinacionog tijela čini polovica od svih njegovih verifikovanih članova. Sve odluke Koordinacionog tijela donosit će se većinom prisutnih članova.

(10) Koordinaciono tijelo podnosi izvještaj o svom radu Izornoj skupštini nakon njenog izbora i konstituiranja svih njenih organa.

Član 99.

Održavanje Izborne skupštine

(1) Na prijedlog Koordinacionog tijela Izborna skupština prvo usvaja Poslovnik o radu Skupštine, a potom Statut, Kodeks advokatske etike, Pravilnik o disciplinskoj odgovornosti, Poslovnik o radu Upravnog odbora, Pravilnik o upisu i vođenju Imenika advokata Advokatske komore Bosne i Hercegovine i po potrebi druge opće akte Advokatske komore Bosne i Hercegovine.

(2) Statut, Kodeks advokatske etike, kao i svi ostali usvojeni opći akti Advokatske komore Bosne i Hercegovine treba da budu usklađeni sa Ustavom Bosne i Hercegovine, međunarodnim pravom i ovim zakonom.

(3) Redovna skupština Advokatske komore Bosne i Hercegovine bit će sazvana i održana u roku od godine dana nakon održavanja Izborne skupštine. Redovne skupštine održavaju se svake godine.

(4) Na svakoj drugoj redovnoj skupštini bit će birano ili reizabrana jedna polovina članova svih organa Advokatske komore Bosne i Hercegovine, a pitanja

ovog izbora bit će riješeno u skladu sa Poslovníkom o radu skupštine, kao i poslovnícima o radu svih organa Advokatske komore Bosne i Hercegovine.

Član 100.

Ministarstvo pravde Bosne i Hercegovine

(1) Ministarstvo pravde Bosne i Hercegovine odgovorno je za provođenje ovog zakona i u tom pogledu blagovremeno donosi sve potrebne odluke.

(2) Ministarstvo pravde Bosne i Hercegovine u svrsi provođenja ovog zakona blisko saraduje sa Koordinacionim tijelom i advokatskim komorama iz člana 11. stav (1) tačka a) i b) ovog zakona, kao i svim ostalim nadležnim organima, institucijama i organizacijama.

(3) Ministarstvo pravde Bosne i Hercegovine saziva i odgovorno je za provođenje Konstituirajuće i Izborne skupštine u skladu sa ovim zakonom.

(4) Ministarstvo pravde i Koordinaciono tijelo zajedno vode i zvanično verifikuju zapisnike sa Konstituirajuće i Izborne skupštine Advokatske komore Bosne i Hercegovine.

Član 101.

Saradnja Advokatske komore Federacije BiH i Advokatske komore Republike Srpske i nadležnih entitetskih ministarstava sa Ministarstvom pravde Bosne i Hercegovine

U svrhu provođenja ovog zakona Ministarstvo pravde Federacije BiH, Ministarstvo pravde Republike Srpske, svi organi Advokatske komore Federacije Bosne i Hercegovine i Advokatske komore Republike Srpske obavezno saraduju sa Ministarstvom pravde Bosne i Hercegovine radi provođenja ovog zakona i neodložno preduzimaju sve potrebne mjere.

Član 102.

Usklađivanje postojećih zakona o advokaturi sa ovim zakonom

Nadležni organi Federacije Bosne i Hercegovine i Republike Srpske, uskladit će svoje zakone i druge propise o advokaturi sa ovim zakonom u roku od dvije godine od dana stupanja na snagu ovog zakona.

Član 103.

Prestanak važenja ranijeg zakona

(1) Danom stupanja na snagu ovog zakona prestaje da važi Zakon o advokaturi Socijalističke Republike Bosne i Hercegovine („Službeni list SR BiH“, broj 34/89).

Član 104.

Stupanje na snagu

Ovaj zakon stupa na snagu osmog dana od dana objavljivanja u „Službenom glasniku Bosne i Hercegovine“.

PS BiH broj: _____

_____ 2007. godine
S a r a j e v o

Predsjedavajući
Predstavničkog doma
Parlamentarne skupštine BiH

Predsjedavajući
Doma naroda
Parlamentarne skupštine BiH

O B R A Z L O Ž E N J E **ZAKONA O ADVOKATURI BOSNE I HERCEGOVINE**

I – USTAVNI OSNOV ZA DONOŠENJE ZAKONA

Ustavni osnov sadržan je u slijedećim odredbama Ustava Bosne i Hercegovine:

- Član II, 1. Ustava Bosne i Hercegovine, propisuje da će Bosna i Hercegovina osigurati najveći nivo međunarodno priznatih ljudskih prava i osnovnih sloboda, među koja prava svakako spada pravo na odbranu, pravo na pravično suđenje, pravo na zastupanje, kao i pravo na djelotvorni pravni lijek (pravo žalbe).
- Član III, 1. g), Ustava Bosne i Hercegovine predviđa da je u nadležnosti institucija Bosne i Hercegovine, provođenje međunarodnih i međuentitetskih politika i regulacija krivičnih propisa, uključujući i odnose s Interpolom.
- Član II, 2. Ustava Bosne i Hercegovine predviđa da prava i slobode određene u Evropskoj Konvenciji za zaštitu ljudskih prava i osnovnih sloboda i njenim protokolima, će se direktno primjenjivati u Bosni i Hercegovini i ona će imati prioritet nad svakim drugim zakonom u Bosni i Hercegovini. Osnovna prava i ljudske slobode koje štiti ili traži da postoje Evropska Konvencija o zaštiti ljudskih prava i osnovnih sloboda, jeste pravo na slobodu i sigurnost koju reguliše član 5. Evropske Konvencije koji ukazuje da se lice može lišiti slobode samo u skladu sa zakonom propisanim postupkom, pravo na pravično suđenje pred nezavisnim i nepristrasnim sudom, koje je propisano u članu 6. Evropske Konvencije, uz mogućnost zastupanja ili odbrane od strane profesionalne stručne službe, uz poseban naglasak prava na odbranu i omogućavanje istovjetnih zakonskih prava državnih organa i advokature, prilikom vođenja sudskog postupka. Također, članom 13. Evropske Konvencije o ljudskim pravima propisano je pravo na djelotvorni pravni lijek i kojim se traži da se svakom licu, čija su prava i slobode narušena ili ugrožena, da ima pravo na pravni lijek pred nacionalnim vlastima i tako omogućiti pravna zaštita lica – stranke pred sudovima i drugim državnim organima ili

- organizacijama, koja svojim pojedinačnim aktima odlučuju o određenim pravima građana.
- U članu II, 3. e) Ustava Bosne i Hercegovine, posebno naglašava pravo na fer saslušanje u građanskim i krivičnim stvarima i druga prava u vezi sa krivičnim postupkom.
 - U članu II, 6. Ustava Bosne i Hercegovine, je propisano da će Bosna i Hercegovina i svi sudovi, agencije, vladini organi primijeniti i pridržavati se ljudskih prava i osnovnih sloboda, na koje je ukazano u stavu 2.
 - U član I. 4. Ustava Bosne i Hercegovine propisano je da entiteti neće ometeti punu slobodu kretanja osoba, roba, usluga i kapitala u cijeloj Bosni i Hercegovini.
 - U članu IV tačka 4. a) Ustava Bosne i Hercegovine je propisano da je Parlamentarna skupština Bosne i Hercegovine nadležna za donošenje zakona koji su potrebni za provođenje odluka Predsjedništva ili da se provedu nadležnosti skupštine po ovom Ustavu.

II – RAZLOZI ZA DONOŠENJE ZAKONA

Razlozi za donošenje Zakona o advokaturi Bosne i Hercegovine, između ostalog, sadržani su i u samom Ustavnom osnovu za donošenje navedenog Zakona, jer je Bosna i Hercegovina Ustavom obavezana da je dužna osigurati najveći nivo međunarodno priznatih ljudskih prava i osnovnih sloboda i omogućiti ostvarivanje takvih prava pred sudovima, državnim organima ili drugim agencijama za sprovođenje zakona, što zahtijeva postojanje advokature, kao samostalne javne i stručne službe ovlaštene za obezbjeđenje pravne zaštite stranaka pred sudovima i drugim državnim organima ili agencijama i putem pružanja takve pravne pomoći omoguće osiguranje Ustavom i zakonom zagarantovanih prava i sloboda građana, istovremeno doprinoseći ostvarivanju i jačanju ustavnosti i zakonitosti u korištenju prava i sloboda koja pripadaju građanima u modernim demokratskim društvima. Posebna važnost navedenog zakona je što se isti donosi u vrijeme reformi cjelokupnog zakonodavstva Bosne i Hercegovine, u momentu dobijanja statusa kandidata zemlje za ulazak u Evropsku Uniju. Obaveza Bosne i Hercegovine, je i donošenje jednog ovako važnog Zakona koji reguliše jednu važnu, profesionalnu i stručnu javnu službu u sklopu cijele ustavne i zakonske strukture u Bosni i Hercegovini i koja treba da dalje doprinese, posebno, u praksi implementaciju svih prava i sloboda, koja su zagarantovana građanima u skladu sa međunarodno pravnim standardima, posebno utvrđenim standardima Suda za ljudska prava u Strasbourgu iz oblasti ljudskih prava i sloboda.

Na nivou Bosne i Hercegovine, između ostalih Zakona, doneseni su Zakon o Sudu i Tužilaštvu Bosne i Hercegovine, Krivični zakon Bosne i Hercegovine, Zakon o krivičnom postupku Bosne i Hercegovine, Zakon o parničnom postupku pred sudom Bosne i Hercegovine, Zakon o visokom sudskom i tužilačkom vijeću Bosne i Hercegovine, Zakon o pravobranilaštvu Bosne i Hercegovine, Zakon o izvršnom postupku Bosne i Hercegovine, Zakon o upravnom postupku Bosne i Hercegovine, Zakon o upravnim sporovima Bosne i Hercegovine, Zakon o upravi Bosne i Hercegovine, Zakon Bosne i Hercegovine o izvršenju krivičnih sankcija, pritvora i drugih mjera, koji ukazuju na neophodnost regulisanja advokature na nivou Bosne i Hercegovine.

Takođe i dosljedna primjena odredaba Europske konvencije o ljudskim pravima i Međunarodnog pakta o građanskim i političkim pravima, kao i sve ostale odredbe međunarodnih ugovora o ljudskim pravima koji su sadržani u Aneksu I Ustava Bosne i Hercegovine, nalažu uspostavu advokature na nivou države Bosne i Hercegovine, koja će biti uređena propisima usklađenim sa najvišim standardima predviđenim Preporukom Odbora ministara Vijeća Europe Rec(2001)21 o slobodi vršenja advokatske profesije, te preporukom Odbora ministara Vijeća Europe: (81) 7, (84) 5, (87) 18, (93) 1, (95) 12, te u Osnovnim principima o funkciji advokata Ujedinjenih naroda iz 1990., kao i u drugim međunarodno pravnim standardima koji se odnose na obavljanje advokatske profesije.

Prema tome, to su sve razlozi koji ukazuju na neophodnost donošenja Zakona o advokaturi na nivou Bosne i Hercegovine koji će omogućiti ostvarenje svih osnovnih principa i standarda iz oblasti advokature koja također, u ovim reformskim procesima i približavanju Bosne i Hercegovine ka Evropskoj Uniji ulazi u evropsku organizaciju advokature.

Također, Bosna i Hercegovina kao potpisnica određenih evropskih konvencija, zatim, kao članica Vijeća Evrope i kao kandidat za pregovaranje za ulazak u Evropsku Uniju, ima obavezu da se pojavljuje kao tužena strana ili tužilac pred određenim organima kao što su Sud za ljudska prava u Strasbourgu, Sud pravde, zatim određene Arbitraže, što također, samo ukazuje na hitnost i neophodnost donošenja navedenog zakona.

III – OBRAZLOŽENJE PREDLOŽENIH PRAVNIH RJEŠENJA

Članom 1. Zakona o advokaturi je regulisano da se ovim Zakonom uređuje organizacija i položaj advokature u Bosni i Hercegovini kao nezavisne i samostalne djelatnosti koja osigurava pružanje stručne pravne pomoći domaćim i stranim fizičkim i pravnim osobama u ostvarivanju i zaštiti njihovih prava, obaveza i pravnih interesa.

U čl. 2., do 7. istaknuti su osnovni principi djelovanja advokature koji garantuju samostalnu, nezavisnu, stručnu i profesionalnu djelatnost.

Čl. 10. do 34. regulisano je osnivanje Advokatske komore Bosne i Hercegovine (u daljem tekstu: AKBiH), njena organizacija, nadležnost, organi, kao i opći akti. U skladu sa članom 11 stav (1) AKBiH čine advokati upisani u advokatske komore Federacije BiH i Republike Srpske, koji udruživanjem u pomenute komore stiču mogućnost prijave za članstvo u AKBiH. Organi AKBiH su skupština, upravni odbor, predsjednik i dva podpredsjednika, nadzorni odbor, disciplinski sud i tužilac, komisija za polaganje advokatskog ispita i drugi organi utvrđeni općim aktima.

Uslovi za obavljanje advokatske djelatnosti, postupak upisa advokata u Imenik advokata AKBiH, kao i momenat započinjanja njegovog profesionalnog rada u skladu sa ovim zakonom regulisani su u čl. 34. do 39. U skladu sa članom 35. predviđeno je pravo upisa u Imenik advokata osobama koje nakon položenog pravosudnog ispita steknu najmanje jednu godinu radnog iskustva na pravnim poslovima u advokaturi, sudu, tužilaštvu ili upravnim i drugim državnim organima, s tim da je data mogućnost i pravo upisa u Imenik advokata i osobama koje nisu radile u navedenim organima a koje imaju položen pravosudni ispit i najmanje šest godina radnog staža na pravnim poslovima. Kao specifičnost u članu 34. stav (2) predviđeno je rješenje, da samo advokati koji su upisani u imenik Advokatske komore Bosne i Hercegovine, mogu

osim prava zastupanja pred nadležnim organima u Bosni i Hercegovini, vršiti zastupanje pred međunarodnim sudskim, upravnim ili drugim organima. U istom članu data je mogućnost da državljanin druge države koji ispunjava uslove za obavljanje advokatske djelatosti ima pravo na upis u Imenik advokata pod uslovom postojanja međudržavnog ugovora ili sporazuma sa državom čiji je državljanin.

Čl. 39. do 50. regulišu prava i dužnosti advokata u zastupanju stranke, a čl. 50. do 54. advokatske nagrade i naknade. U članu 50. stav 2. propisano je da Skupština Advokatske komore BiH, predlaže Advokatsku tarifu koju odobrava Ministarstvo pravde Bosne i Hercegovine.

U članovima 54. do 70. istaknuti su oblici organizovanja advokature, izraženi kroz advokatske kancelarije, zajedničke advokatske kancelarije i advokatska društva, što znači da Zakon daje mogućnost samostalnog obavljanja djelatnosti ali isto tako i mogućnost udruživanja advokata u zajedničku advokatsku kancelariju, kao i osnivanje advokatskog društva. Advokatska društva se kao pravne osobe osnivaju u skladu sa zakonom koji uređuje osnivanje poslovanje i prestanak privrednih društava, odnosno preduzeća, s tim da članovi advokatskog društva mogu biti samo advokati i njihov rad je ograničen na obavljanje advokatske djelatnosti.

Čl. 68. i 69. predviđaju mogućnost priznavanja advokatu specijalnosti u određenoj oblasti pod uslovima određenim Zakonom i po postupku određenom u Statutu.

Čl. 70. do 75. regulišu prestanak prava na obavljanje advokature i privremenu zabranu vršenja advokatske djelatnosti.

Čl. 76. do 82. uređuju status advokatskih pripravnika i to sticanje svojstva advokatskog pripravnika, prava i dužnosti, brisanje iz imenika advokatskih pripravnika i dr.

Čl 82. do 92. daju se opća načela disciplinske odgovornosti advokata i advokatskih pripravnika kao osnove za izradu i donošenje pravilnika o disciplinskoj odgovornosti advokata i advokatskih pripravnika.

Čl. 92. do 95. regulisana je oblast finansiranja advokatske komore.

U prijelaznim i završnim odredbama sadržani su članovi kojima se propisuje procedura održavanja konstituirajuće i izborne skupštine AKBiH, te odredbe o obavezi usklađivanja drugih propisa sa ovim zakonom, kao i stupanje zakona na snagu.

IV- PROVEDBENI MEHANIZMI

Za provedbu Zakona prema članu 100. odgovorno je Ministarstvo pravde Bosne i Hercegovine koje u fazi uspostave organa Advokatske komore Bosne i Hercegovine saziva i odgovorno je za provođenje Konstituirajuće i Izborne skupštine u skladu sa zakonom. U svrhu provođenja Zakona Ministarstvo pravde usko saraduje sa advokatskim komorama i ministarstvima pravde entiteta.

V- REVIZIJA POSTOJEĆIH PROPISA

Zakon predviđa usklađivanje postojećih zakona o advokaturi i drugih propisa iz oblasti advokature sa ovim zakonom i to u roku od dvije godine od dana stupanja na snagu ovog zakona.

IV – FINANSIJSKA SREDSTVA ZA PROVOĐENJE ZAKONA

Zakonom je predviđeno da se Advokatska komora BiH finansira isključivo iz vlastitih sredstava, kao što su sredstva od redovnog članskog doprinosa, naknade za upis u imenik advokata i drugih zakonom dozvoljenih izvora finansiranja. U članu 92. stav (2) Zakona posebno je istaknuto da se sredstva koja obezbijede državni organi i institucije ne mogu koristiti za finansiranje Advokatske komore BiH, ukoliko bi korištenje ovih sredstava, na bilo koji način, moglo ugroziti princip nezavisnosti i samostalnosti advokature.

Imajući u vidu navedeno za provođenje ovog zakona neće biti potrebno osigurati dodatna sredstva u Budžetu Bosne i Hercegovine.